

ÉKSODO

Ini Sa Igsulat I Mosis Denu Sa Kelegkà Etaw Hudiyu

Ini Denu Sa Libelu Éksodo

Ini sa keduwa igsulat i Mosis. Iya sa selepangan sa Éksodo sa kelegkà, enù ka egtulonen siini sulat denu sa kepelegkà i Nemula sa medoo tugod i Islaél kedu diyà sa egoh da neudipen dutu tanà Igiptu dò.

Duen epat baed diyà sa libelu Éksodo, dodoo beken langun sa nekesulat diyà siini sulat enù ka nehemilì daa sa kagi miulan. Ini sa epat baed di.

1. Sa kelaun i Nemula sa medoo etaw Hibelu tugod i Islaél kedu diyà sa egoh da neudipen.

2. Sa keipanaw da mangay dutu Getan Sinay dò, pinengadanan ma Getan Holéb.

3. Sa pasad binaelan i Nemula diyà siedò medoo etaw hinemilì di, kenà di migbegay sa uledin di anì kumepion sa keugpà da anì meketigkel da ma.

4. Sa ketulù i Nemula denu sa kebael da kemalig kenà da sumimbà owoy sa langun ilùilù di, owoy igtulù di ma denu sa galebek sa medoo tegesimbà owoy denu sa adat kesimbà da diyà si Nemula sa kenà di metuuwan.

Neselepeng iya wé diyà siini libelu, dodoo duen ma sa sebaen selepangan di, enù ka ini lagà sa tuladan denu si Hésus Kelistu owoy sa kealuk di kenita etaw kedu diyà sa egoh ta neudipen diyà salà.

Ini Denu Sa Nebaelan Sa Medoo TegeIslaél Dutu Igiptu Dò

1 ¹Na, ini sa medoo anak i Hakob maama mig-unut kenagdi egoh di mig-edoh dutu Igiptu dò lapeg sa medoo malayan da. ²⁻⁴Ini sa ngadan sa medoo anak di, si Lubin, si Simiyon, si Lebi, si Huda, si Isakal, si Sabulon, si Bénhamin, si Dan, si Naptali, si Gad owoy si Asél. ⁵Pitu pulù da langun mig-edoh dutu Igiptu dò, liyu daa si Hosé enù ka tapay dé dutu.

⁶Na, egoh di nelugay dé, nematay Hosé i owoy sa langun duma di telahadi egoh iya. ⁷Dodoo sa medoo tugod da tegeIslaél, eg-uman da

egkedoo. Hê, nebelet da dé siedò tanà kenà da mig-ugpà, enù ka tigtu migkedoo da temù.

⁸Na, egoh di nelugay, duen sa sebaen ma datù pinengadanan da Palo sa egsabà sa tanà Igiptu. Endà neketiig di denu si Hosé egoh anay. ⁹“Taa yu,” guwaen di diyà sa medoo duma di tegeIgiptu, “tigtu migkedoo dé siini etaw tegeIslaél owoy melikutan ki dé sumabà kenagda. ¹⁰Huenan di, lagbeten ta sa ukit ta pesabuh sa kedoo da. Enù ka amuk gumila sa medoo kuntelà ta diyà kenita, tumampil kéen siini medoo tegeIslaél diyà kenagda. Amuk hediya, mekelaun da kéen kedu diyà sa tanà ta Igiptu.”

¹¹Huenan di, inudipen sa medoo tegeIgiptu sa medoo tegeIslaél, owoy hinemilì da ma sa medoo mebalaw etaw egbantay kenagda. Egpegesen da kagda egpebael sa mepasang galebek anì mesemek da anì endà dé muman da kumedoo. Pinebael da kagda sa duwa dakel menuwa, Pitom owoy Lamésis, kenà i Palo migtagù sa langun taman di. ¹²Dodoo apiya di pa egkepelihay da dé, uman da doo egkedoo sa tegeIslaél owoy egkeseluh da ma dé iya wé tanà Igiptu. Hê, egkelimedangan temù sa tegeIgiptu diyà sa medoo tegeIslaél. ¹³Huenan di, tigtu egpelihayen da kagda egpebael sa mepasang galebek. ¹⁴Apiya sa tigtu melikut, ipebael da doo diyà kenagda enù ka egpelihayen da kagda temù, owoy ipebael da ma diyà kenagda sa medoo metegas tanà anì baelan dalesan. Hediya ma, igsugù da ma diyà kenagda sa langun balangan galebek diyà sa tinibah da.

¹⁵Agulè mig-ikagi sa datù tegeIgiptu diyà sa duwa bayi, si Siplah owoy si Puwa, sa tegeesò diyà sa medoo etaw Hibelu.^a Guwaen di diyà kenagda, ¹⁶“Na, kiyu i tegeesò, amuk egbuligan yu sa bayi Hibelu eglesutan, amuk maama sa eg-anaken da, imatayi yu. Dodoo amuk bayi, hagtay yu.” ¹⁷Dodoo sa tegeesò si Siplah owoy si Puwa, egpigtuu da diyà si Nemula, huenan di endà migpangunut da diyà sa igsugù sa datù diyà kenagda. Endà eg-imatayan da duu, apiya di pa maama sa inanak da. ¹⁸Agulè igpeangay sa datù dema kagda owoy eg-igsaan di, guwaen di, “Maen di ya endà egpangunutan yu duu sa igsugù ku keniyu owoy eghagtayen yu polo sa medoo maama inanak sa etaw Hibelu?”

¹⁹Migsagbì da, guwaen da, “Siini medoo bayi Hibelu, endà lagà da sa bayi tegeIgiptu. Enù ka mebagel da owoy melemu sa kelesut sa anak da. Huenan di, miglesut dé sa anak da sa egoh ké endà pa egtebow.”

²⁰Tigtu egkeguwad sa etaw tegeIslaél taman egkedoo da temù. Owoy siedò bayi tegeesò, egtabangan i Nemula kagda. ²¹Enù ka danà da egpigtuu diyà kenagdi, egtabangan di kagda anì duen ma sa hagda medoo anak.

²²Agulè migsugù sa datù diyà sa langun etaw di, guwaen di, “Sa langun maama eg-anaken sa tegeIslaél, buungi yu diyà sa lawa't wayeg Nilo. Dodoo amuk bayi sa eg-anaken da, hagtay yu.”

^a 1:15 Etaw Hibelu ma sa pinengadanan sa medoo tegeIslaél.

Ini Denu Sa Kelesut I Mosis

2 ¹Na, egoh iya, duen sa telesawa etaw Hibelu tugod i Lebi. ²Mig-obol sa bayi owoy mig-anak maama. Egoh di mighaa tigtu metolol sa batà, iglidung di takà taman telu gebulan. ³Dodoo egoh di endà dé egkebaluy di duu eglidung sa batà, eg-onomen di sa dakel kampilù owoy eglabulen di gità anì endà meawuhan di wayeg. Agulé egdalemen di sa batà owoy inuwit di diyà sa keluwenluwen diyà sa kilidan wayeg Nilo. ⁴Na, sa tebay sa batà, eglidung medapag anì hauwen di sa mebaelan sa hadi di.

⁵Na, egoh iya, mig-angay egpedigus sa bayi anak i Palo diyà sa wayeg Nilo owoy eg-unutan ma sa medoo udipen di. Egoh da eg-ipanawpanaw diyà sa ilis wayeg, nehauwan di sa kampilù diyà sa medoo keluwen dahiya. Agulé sinugù di sa sebaen udipen di anì angayen di. ⁶Egoh di migkuwa, eg-awangan di owoy iya sa dalem di sa batà maama egsinegaw. Egoh di mighaa, eghiduwan di sa batà owoy guwaen di, “Ini kéen sa anak sa etaw Hibelu.”

⁷Agulé miglesut sa kakay sa batà owoy guwaen di diyà sa anak i Palo, “Meiyap ka pa amuk angayen ku sa bayi etaw Hibelu anì pesusuwen ko diyà kenagdi sa batà?”

⁸“Hoò,” guwaen sa anak i Palo, “angay ko.” Agulé inangay sa batà sa inay di. ⁹Egoh da migtebow, guwaen sa anak i Palo, “Ipat ko siini batà, sukayan ku daa kuna.” Huenan di, egkuwaen doo sa inay di sa hagdi anak owoy eglikù anì ipaten di dema. ¹⁰Agulé egoh sa batà migkedakel dé, inuwit sa inay di diyà siedò anak i Palo. Linomò sa anak i Palo sa batà owoy guwaen di, “Na, danà ku migkuwa kenagdi diyà sa wayeg, si Mosis^b sa kepengadan ku kenagdi.”

Ini Sa Egoh I Mosis Migpelaguy Dutu Tanà Midiyan Dò

¹¹Na sebaen agdaw, egoh i Mosis migkipedu dé, inangay di egtelow sa medoo duma di etaw Hibelu. Hinaa di sa kelikutan da danà sa mepasang galebek da. Hinaa di ma sa duma di etaw Hibelu binalbal sa tegeIgiptu. ¹²Egoh di mighaa iya wé, eglangalanga. Hê, endà duen sa liyu etaw hinaa di, huenan di eg-imatayan di iya wé tegeIgiptu owoy iglebeng di diyà sa enay-enay. ¹³Agulé egoh di umenaw simag, migpelikù dema Mosis i egtelow sa medoo duma di. Hê, hinaa di sa duwa etaw Hibelu egkeseginalu. Inigsaan di sa egtibabà, guwaen di, “Maen di ya egpelihayen ko siini duma ko, ki anan yu etaw Hibelu?”

¹⁴Migsagbì sa maama, guwaen di, “Keduwan sa egkegaga ko kumukum kenak? Datù ka atu? Imatayan ko ma aken lagà siedò tegeIgiptu inimatayan ko egoh neagdaw?”

^b 2:10 Diyà sa kagi Hibelu, nesetepeng sa ligeng kagi Mosis owoy kinuwa.

Na, egoh i Mosis migdineg iya wé inikagi di, nelenawan enù ka guwaen di diyà sa pedu di, “Ay, miglalag doo sa binaelan ku diyà siedò tegeIgiptu.”

¹⁵Na, egoh i Palo migdineg denu sa binaelan i Mosis, iya sa ungayà di meimatayan Mosis i. Dodoo migpelaguy polo eg-angay dutu tanà Midiyan dò. Egoh di migtebow dutu, migpenuu medapag diyà sa paligì.

¹⁶Agulé migtebow sa pitu bayi anak i Hételo^c sa tegesimbà dutu Midiyan dò. Eg-angay da egkuwa wayeg anì peinem da sa medoo hinagtay sa emà da kebibibili owoy kambing. ¹⁷Agulé duen ma sa medoo liyu tegeipat kebibibili migtebow owoy eghemagawan da siedò medoo hinagtay i Hételo. Egoh i Mosis mighaa iya wé, eg-alukan di siedò medoo bayi owoy egbuligan di ma kagda egpeinem sa medoo hinagtay da.

¹⁸Na, egoh da miglikù, eg-igsaan sa emà da kagda, guwaen di, “Maen di ya medelamet yu eglikù ini egoh di?”

¹⁹Migsagbì da, guwaen da, “Mapes ké eglikù enù ka duen sa etaw tegeIgiptu migtabang kenami egoh sa medoo liyu tegeipat hinagtay mighemaga kenami kedu diyà sa paligì. Binuligan di kami egkuwa wayeg owoy pineinem di ma sa medoo kebibibili ta.”

²⁰“Kenà di dé igoh?” guwaen sa emà da. “Maen di ya sinalidan yu kagdi? Angay yu anì kumaen ma diyà kenita.”

²¹Huenan di, egkeiyap ma Mosis i eg-ugpà diyà kenagda. Agulé ipesawa i Hételo diyà si Mosis sa sebaen anak di, si Sipola. ²²Agulé egoh da nesesawa, mig-anak maama Sipola i. Pinengadanan i Mosis sa anak di si Gilsom, owoy guwaen di, “Iya sa kepengadan ku kenagdi enù ka beken a tigtu etaw diyà siini tanà Midiyan.”

²³Na, egoh di nelugay dé, nematay siedò datù diyà sa tanà Igiptu. Dodoo tapay doo egkeudipen sa medoo tegeIslaél dutu. Huenan di, tigtu da egsinegaw owoy takà da egpegeni diyà si Nemula danà sa dakel lihay da. ²⁴Dinineg i Nemula sa kepegeni da tabang, owoy endà nelipengan di duu sa igpasad di diyà sa medoo tupù da, si Ablaham owoy si Isak owoy si Hakob. ²⁵Netiigan di ma neudipen sa medoo tegeIslaél dutu Igiptu dò, huenan di eghiduwan di kagda.

Ini Sa Egoh I Nemula Migsugù Si Mosis Eg-angay Igiptu Dò

3 ¹Na, sebaen agdaw egoh i Mosis eg-ipat sa medoo kebibibili owoy kambing sa nugangan di si Hételo, sa tegesimbà dutu tanà Midiyan dò, inuwit di sa medoo hinagtay dutu dibaluy sa melabel tanà mediya dalesan. Nekeuma diyà sa Getan Sinay pinengadanan da ma sa getan i Nemula. ²Egoh i Mosis diyà sa esudan siedò getan, migtelabuk sa Egsugùsuguen i Nemula^d diyà

^c 2:16 Si Luyél sa sebaen ngadan i Hételo. ^d 3:2 Beken sa liyu egsugùsuguen i Nemula ini i, dodoo tigtu Nemula. Egoh anay egoh i Hésus endà pa migtebow diyà tanà, medoo gulè mig-angay Nemula i egtelabuk diyà sa etaw. Sa Egsugùsuguen i Nemula sa ngadan di amuk mig-angay egtelabuk diyà sa etaw.

kenagdi. Dodoo iya daa sa hinaa i Mosis sa legleg apuy diyà sa tukééy kayu. Eg-inengtengen di sa eglegleg dodoo endà ma egkeulow di. ³“Maen iya wé?” guwaen di. “Pedapag a polo anì hauwen ku siini egkegaipan ku, sa pesuwan di endà meulow sa tukééy kayu.”

⁴Dodoo egoh i Mosis egdapag, inumow i Datù Nemula kagdi kedu diyà siedò eglegleg, guwaen di, “O Mosis, Mosis.”

Migsagbì Mosis i, guwaen di, “Kaini a doo.”

⁵Guwaen i Nemula, “Yaka dé eg-angay ya egpedapag. Lengà ko sa talumpà ko, enù ka mapulù siini tanà egtigdegan ko danà ku migtenà dahini. ⁶Aken si Nemula sa egpigtuuwen sa medoo tupù ko, si Ablaham owoy si Isak owoy si Hakob.” Na, egoh i Mosis migdineg iya wé, egdìlungan di sa palas di enù ka egkelimedangan eghaa si Nemula.

⁷Agulè mig-ikagi Datù Nemula i diyà kenagdi, guwaen di, “Tigtu hinaa ku dé sa dakel lihay sa medoo etaw ku dutu Igipçu dò. Dinineg ku ma sa kepegeni da tabang diyà kenak danà sa kepelihay sa ulu-ulu da kenagda, owoy tigtu eghiduwan ku kagda. ⁸Huenan di, migtenà a anì alukan ku kagda kedu diyà sa egkegaga sa medoo tegelIgipçu. Launen ku kagda kedu diyà siedò tanà owoy uwiten ku ma kagda mangay diyà sa melabel tanà kebaluyan sa langun hinemula. Iya sa tanà kenà da eg-ugpà ini egoh di sa medoo etaw tegeKanan owoy sa etaw Hétiyo owoy sa etaw Amoliya owoy sa etaw Pélisiya owoy sa etaw Hibiyo owoy sa etaw Hébusiyo. ⁹Dinineg ku doo sa kepegeni sa medoo etaw ku tabang diyà kenak owoy netiigan ku ma doo sa kepelihay sa medoo tegelIgipçu kenagda. ¹⁰Huenan di, peangayen ku kuna diyà si Palo sa datù tanà Igipçu dò anì uwiten ko kedu dutu sa medoo etaw ku tugod i Islaél.”

¹¹“Yaka,” guwaen i Mosis egsagbì diyà si Nemula. “Beken aken sa mekeangay diyà sa taengan i Datù Palo anì uwiten ku sa medoo etaw tegeIslaél kedu Igipçu dò.”

¹²Guwaen i Nemula, “Yaka egkebukul la, enù ka aken doo sa duma ko. Owoy ini ma sa tandà di aken sa migpeangay keniko. Amuk meuwit ko sa medoo etaw ku kedu Igipçu dò, diyà siini getan doo sa kenà yu sumimbà diyà kenak.”

¹³Dodoo mig-ikagi Mosis i diyà si Nemula, guwaen di, “Upama amuk mangay a diyà sa medoo tegelIslaél owoy tulonen ku diyà kenagda aken sa pineangay i Nemula sa egpigtuuwen sa medoo tupù ta, igsaen da kéen ngadan sa migpeangay kenak. Amuk hediya, ngadan sa isagbì ku diyà kenagda?”

¹⁴Guwaen i Nemula, “Aken si Nemula endà duen inedungan owoy endà duen ketamanan. Huenan di, ini sa tulon ko diyà kenagda, guwaen ko, ‘Si Nemula endà duen inedungan owoy endà duen ketamanan sa migpeangay kenak.’ ” ¹⁵Guwaen ma i Nemula, “Tulon ko ma diyà sa medoo tegelIslaél, guwaen ko, ‘Si Datù Nemula^e, sa Nemula egpigtuuwen

^e 3:15 Siini Datù Nemula, Yahweh sa ngadan di diyà sa kagi Hibelu.

sa medoo tupù ta, si Ablaham owoy si Isak owoy si Hakob, kagdi sa migpeangay kenak diyà keniyu.’ Tulon ko iya wé diyà kenagda enù ka iya sa kepengadan da kenaken mesetugodtugod taman melugay.

¹⁶ “Na, ipanaw ka dé. Amuk tumbow ka dutu, setipon ko sa medoo ulu-ulu etaw tegeIslaél. Tulon ko diyà kenagda, guwaen ko, ‘Si Datù Nemula sa Nemula egpigtuuwen sa medoo tupù ta, si Ablaham owoy si Isak owoy si Hakob, sa migpehaa diyà kenak. Owoy guwaen di hinaa di sa kebael sa medoo tegeIgiptu diyà keniyu. ¹⁷Owoy guwaen di ma ungayà di launen di kiyu kedu diyà Igiptu sa kenà yu egkepelihay. Uwiten di kiyu mangay diyà sa melabel tanà kebaluyan sa langun hinemula, sa tanà kenà da eg-ugpà ini egoh di sa medoo etaw tegeKanan owoy sa etaw Hétioy owoy sa etaw Amoliya owoy sa etaw Pélisiya owoy sa etaw Hibiyo owoy sa etaw Hébusiyo.’ ¹⁸Iya sa ikagi ko diyà sa medoo ulu-ulu tegeIslaél anì pigtuuwen da kuna.

“Agulé enggat ko sa medoo ulu-ulu tegeIslaél mangay diyà sa datù diyà sa tanà Igiptu. Owoy ikagi ko diyà kenagdi, guwaen ko, ‘Si Datù Nemula, sa Nemula egpigtuuwen ké, sa migpehaa diyà kenami i etaw Hibelu. Huenan di, egpegeniyen ké sa keipanaw ké taman telu agdaw anì mangay ké dutu sieddò melabel tanà mediyù dalesan anì mimatay ké hinagtay enù ka iya sa adat kesimbà ké diyà si Datù Nemula sa egpigtuuwen ké.’ ¹⁹Iya sa ikagi ko diyà sa datù tanà Igiptu, dodoo tapay dé netiigan ku endà pandayaen di duu kiyu amuk endà metegel di. ²⁰Huenan di, ipehaa ku diyà kenagdi sa tunung ku. Pigtamayan ku sa medoo tegeIgiptu danà sa medoo egkegaipan etaw baelan ku diyà kenagda. Amuk meubus iya wé, pandayaen di doo kiyu lumegkà. ²¹Owoy ini ma sa baelan ku amuk lumegkang yu, pepionen ku sa pedu sa medoo tegeIgiptu diyà keniyu anì metawag da megay diyà keniyu anì dumuen sa uwiten yu amuk mipanaw yu. ²²Huenan di, mekepegeni sa langun bayi tegeIslaél diyà sa duma da tegeIgiptu nesedapag dalesan owoy diyà sa bayi tegeIgiptu eg-ugpà diyà kenagda. Pegeniyen da sa medoo imu-imu binaelan da bulawan owoy pilak owoy sa medoo ginis ma anì ipekawal yu diyà sa medoo anak yu. Amuk hediya, lagà kedanan yu sa langun taman sa medoo tegeIgiptu.”

Ini Sa Egoh I Nemula Migbegay Diyà Si Mosis

Sa Egkegaga Di Egbael Panduan

4 ¹Agulé migsagbi Mosis i diyà si Nemula, guwaen di, “Ngadan sa baelan ku amuk endà migtuu sa medoo tegeIslaél diyà kenak, amuk guwaen da endà migpehaa ka diyà kenak?”

²Agulé guwaen i Datù Nemula diyà kenagdi, “Ngadan iya wé egsabaan ko?”

“Tuked,” guwaen i Mosis.

³Guwaen i Datù Nemula, “Dugsui ko diyà tanà.”

Hê, egoh i Mosis migdugsù sa taked, petow dé nebaluy uled. Eg-esud-esud Mosis i enù ka egkelimedangan. ⁴Dodoo guwaen i Datù Nemula diyà kenagdi, “Kuwa ko dema, sabai ko sa ikug di.” Huenan di, egoh i Mosis migsabà sa ikug di, nebaluy dema taked. ⁵Agulé guwaen i Nemula, “Éhê iya sa baeli ko anì pigtuuwen da sa egoh ku migpehaa a diyà keniko, aken i Datù Nemula, sa Nemula egpigtuuwen sa medoo tupù da, si Ablaham owoy si Isak owoy si Hakob.”

⁶Agulé guwaen i Datù Nemula dema, “Lusud ko sa belad ko diyà sa igkawal ko.” Agulé egoh i Mosis miglusud sa belad di diyà sa igkawal di owoy linaun di dema, migkebulà dé enù ka nebaluy dempid.

⁷Hê, mig-ikagi dema Datù Nemula i, guwaen di, “Lusud ko dema sa belad ko.” Hê, migpangunut Mosis i. Egoh di miglaun dema sa belad di, petow dé nekedan sa dempid di.

⁸Agulé guwaen i Datù Nemula, “Amuk endà migtuu sa medoo tegeIslaél diyà keniko owoy amuk endà ma metuuwan da diyà siini muna egkegaipan etaw egbaelan ko, migtuu da doo diyà sa keduwa panduan. ⁹Dodoo amuk endà pa migtuu da diyà siini duwa panduan owoy amuk endà ma pigtuuwen da duu sa tinulon ko diyà kenagda, kuwa ka sa wayeg kedu diyà sa lawa't wayeg Nilo owoy buwah ko diyà sa netikal tanà anì mebaluy depanug iya wé wayeg.”

¹⁰Agulé guwaen i Mosis dema diyà si Nemula, “O Datù, beken aken hedem sa egsuguen ko, enù ka endà tigtu di metumàmà sa keikagi ku edung egoh anay taman sa egoh ko mig-ikagi diyà kenak ini egoh di. Endà mebehol sa keikagi ku enù ka endà iseg di egkekiwol sa dilà ku.”

¹¹Dodoo migsagbi Datù Nemula i, guwaen di, “Ngadan di etaw sa migbael sa ebà sa etaw amuk beken aken? Owoy ngadan di etaw ma sa egpebisu etaw ataw ka egpebuneg sa etaw? Owoy ngadan di etaw ma sa egpeilag sa etaw ataw ka egpelangap sa etaw? Aken i Datù Nemula doo sa egpekebael langun iya wé. ¹²Na, ipanaw ka dé. Tabangan ku pa kuna anì mepion sa keikagi ko owoy itulù ku ma diyà keniko sa ikagiye ko.”

¹³Dodoo migsagbi Mosis i, guwaen di, “Yaka, o Datù. Tigtu egpegekiye ku sa liyu etaw polo sa peangayen ko dutu.”

¹⁴Hê, binulitan i Datù Nemula Mosis i. Guwaen di, “Duen sa kakay ko si Alon tugod i Lebi. Netiigan ku metumàmà sa keikagi di. Eg-ipanaw dé eg-angay tumelabuk keniko, owoy tigtu meanggan amuk mesehaa yu.

¹⁵Huenan di, tulon ko diyà kenagdi sa langun inikagi ku diyà keniko owoy anì selepangan di ma diyà sa medoo duma yu. Tabangan ku kiyu sa ikagiye yu owoy itulù ku ma diyà keniye sa baelan yu. ¹⁶Lagà sa ebà ko si Alon enù ka kagdi sa mikagi diyà sa medoo etaw, owoy lagà ka Nemula di enù ka kuna sa tumulù kenagdi sa langun ikagiye di.

¹⁷Uwit ko ma siini taked ko enù ka iya sa ibael ko panduan egkegaipan etaw.”

Ini Sa Egoh I Mosis Migpelikù Dutu Igiptu Dò

¹⁸Agulé miglikù Mosis i anì umebal diyà sa nugangan di, si Hételo. Egoh di migtebow, guwaen di, “O Momò, ungayà ku pelikù a diyà sa medoo duma ku dutu Igiptu dò anì metiigan ku sa keugpà da.” Agulé hinoò sa nugangan di, guwaen di, “Mebaluy mipanaw ka dé.”

¹⁹Na, egoh i Mosis pelà diyà sa tanà Midiyan, mig-ikagi Datù Nemula i diyà kenagdi, guwaen di, “Pelikù ka dutu Igiptu dò, enù ka nematay dé sa langun etaw egkelukuy mimatay keniko.” ²⁰Agulé inuwit i Mosis sa sawa di owoy sa duwa anak da owoy pinekudà di kagda diyà sa asnu enù ka mipanaw da mangay Igiptu dò. Inuwit di ma sa tuked di igpeuwit i Nemula diyà kenagdi.

²⁷Na, egoh da i Mosis endà pa migtebow dutu Igiptu dò, mig-ikagi Datù Nemula i diyà si Alon, guwaen di, “Angay ko siegung Mosis i dutu siedò melabel tanà mediyù dalesan.” Huenan di, siniegung i Alon Mosis i diyà siedò getan pinengadanan da getan i Nemula. Egoh da nesehaa, pinengadekan di. ²⁸Agulé tinulon i Mosis diyà si Alon sa langun inikagi i Datù Nemula diyà kenagdi, lapeg sa medoo panduan egkegaipan etaw ipibael i Nemula diyà kenagdi. ²⁹Agulé neseunut da dema eg-angay dutu Igiptu dò anì setiponen da sa langun ulu-ulu tegeIslaél. ³⁰Egoh da nesetipon, tinulon i Alon diyà kenagda sa langun inikagi i Datù Nemula diyà si Mosis, owoy binaelan i Mosis ma diyà sa taengan da sa medoo panduan egkegaipan etaw. ³¹Agulé migpigtuu dé sa medoo tegeIslaél. Egoh da neketiig eghiduwan i Datù Nemula kagda owoy netiigan di ma sa lihay da, egligkued da eg-olò si Nemula.

Ini Sa Egoh Da I Mosis Mig-angay Diyà Si Palo

5 ¹Agulé mig-angay Mosis i owoy si Alon diyà si Palo sa datù tegeIgiptu. Egoh da migtebow, guwaen da, “O Datù, ini sa kagi i Datù Nemula, sa Nemula egpigtuuwen sa medoo tegeIslaél, guwaen di, ‘Pandayà ko siini medoo etaw ku mipanaw dutu siedò melabel tanà mediyù dalesan, anì sumimbà da diyà kenak dutu.’”

²Dodoo migsagbì Palo i, guwaen di, “Ngadan di etaw iya wé Datù Nemula? Ngadan di etaw sa egsugù kenak anì pandayaen ku sa medoo tegeIslaél mipanaw? Endà egkilalaen ku duu iya wé Datù Nemula tinulon yu, owoy endà ma pandayaen ku duu sa medoo tegeIslaél mipanaw.”

³Agulé guwaen i Mosis owoy si Alon, “Tigtu migpehaa diyà kenami sa Nemula egpigtuuwen ké, kami i medoo Hibelu. Huenan di, pandayà ko kami, hih, mipanaw taman telu agdaw anì mangay ké dutu siedò melabel tanà mediyù dalesan anì mimatay ké hinagtay enù ka iya sa adat kesimbà ké diyà si Datù Nemula sa egpigtuuwen ké. Amuk endà mangay ké dutu, pigtamayan di kami kéen danà sa linadu ataw ka gila.”

⁴Dodoo migsagbì sa datù tegeIgiptu diyà si Mosis owoy si Alon, guwaen di, “Maen di ya egbogowen yu sa medoo etaw eggalebek? Pelikù yu dé diyà sa galebek yu. ⁵Tigtu subela dé sa kedoo yu etaw Hibelu. Ungayà yu kéen igoh peetuden yu kagda diyà sa galebek da.”

⁶Hê, iya ma dé sa agdaw egoh i Datù Palo migsugù diyà sa medoo ulu-ulu tegeIgiptu owoy sa medoo tegebantay sa etaw tegeIslaél. Guwaen di diyà kenagda, ⁷“Edung ini egoh di yoko dé egbegayan duu sa medoo tegeIslaél sa legami iamut da diyà sa tanà egpetegasen da anì kagda dé polo sa mangay kumuwa sa legami iamut da. ⁸Dodoo hediya mendaa sa kedoo baelan da lagà sa egoh muna. Endà mesiat di apiya sebaen. Egpauc da dé, huenan di egpegeni da diyà kenak anì mangay da sumimbà diyà sa nemula da. ⁹Umani yu pa pelikut sa galebek da anì endà dé duen ulas da dumineg sa medoo butbut da i Mosis.”

¹⁰Agulé mig-angay sa medoo ulu-ulu tegeIgiptu owoy sa medoo tegebantay tegeIslaél egtulon diyà sa medoo tegeIslaél. Guwaen da, “Ini sa kagi i Datù Palo, endà dé mebegayan ké kiyu uman sa legami. ¹¹Kiyu dé polo sa mangay kumuwa sa legami iamut yu diyà sa tanà, sumalà dé sa kenà yu mekehaa. Dodoo sa kedoo metegas tanà egbaelan yu, endà kumulang di apiya sebaen daa.”

¹²Agulé nesepalak sa medoo tegeIslaél diyà sa uwang tanà Igiptu, enù ka eglagbeten da sa legami iamut da diyà sa tanà. ¹³Tigtu egpegesen sa medoo ulu-ulu kagda egpegalebek, guwaen da, “Téél yu dé. Ubus yu dé sa kedoo egbaelan yu metegas tanà uman agdaw, éhê mendaa sa kedoo binaelan yu egoh muna egoh yu pelà egbegayan legami.” ¹⁴Agulé egtapesen sa medoo ulu-ulu sa medoo pinebantay da tegeIslaél diyà sa medoo eggalebek. Owoy guwaen da, “Maen di ya kulang sa kedoo binaelan yu metegas tanà, enù ka beken éhê sa kedoo di egoh muna?”

¹⁵Agulé mig-angay sa medoo tegebantay diyà si Palo anì tulonen da sa kelikutan da. Guwaen da, “O Datù Palo, maen di ya egbaelan ko ini i diyà kenami, kami i egsugùsuguen ko? ¹⁶Enù ka tinegel da kami takà egpebael sa metegas tanà, apiya di pa endà dé binegayan ké legami. Owoy tinapes da ma kami, apiya di pa beken nami salà, dodoo sa etaw ko polo sa épê salà enù ka endà egbegay da legami diyà kenami.”

¹⁷Migsagbì Datù Palo i, guwaen di, “Tigtu pauken yu etaw. Maked yu dé gumalebek. Huenan di, takà yu egpegeni diyà kenak anì pandayaen ku kiyu mangay mimatay sa hinagtay ibegay yu diyà si Datù Nemula. ¹⁸Na, pelikù yu polo diyà sa galebek yu. Endà duen legami mekebegay diyà keniyu, dodoo nesetepeng doo sa kedoo metegas tanà egbaelan yu éhê mendaa sa kedoo di egoh muna.”

¹⁹Agulé melikutan sa pedu sa tegebantay etaw tegeIslaél egoh da migdineg sa inikagi i Palo, guwaen di nesetepeng doo sa kedoo metegas tanà egbaelan da uman agdaw, lagà mendaa sa egoh muna, apiya di pa

endà dé mebegayan da legami. ²⁰Egoh da migsalid diyà si Palo, hinaa da Mosis i owoy si Alon eg-angat-angat kenagda. ²¹Guwaen da diyà kenagda, “Mepigtamayan i Datù Nemula doo kiyu danà sa binaelan yu diyà kenami. Enù ka kiyu sa pesuwan di egkelepuhan i Palo owoy sa medoo salu di kami. Egbaelan yu daa sa pesuwan da mimatay kenami.”

Ini Sa Egoh I Nemula Migpeeles Sa Pasad Di Lumaun Sa Medoo Etaw Di

(Éksodo 5:22–6:12)

²²Agulé mig-angay dema Mosis i eg-ikagi diyà si Datù Nemula, guwaen di, “O Datù ku, maen di ya hediya sa kepelehay ko siini medoo etaw ko? Maen di ya pineangay ko aken dini? ²³Enù ka edung sa egoh ké mig-angay diyà si Palo anì tulonen ké diyà kenagdi sa langun inikagi ko, egbaelan di polo sa tigtu medaet diyà siini medoo etaw ko. Owoy endà duen sa binaelan ko anì alukan ko kagda.”

6 ¹Agulé mig-ikagi Datù Nemula i diyà si Mosis, guwaen di, “Na, hauwen ko doo sa baelan ku diyà si Palo. Danà sa dakel egkegaga ku, tegelen ku diyà kenagdi pelegkà sa medoo etaw ku. Beken uloy daa sa kepelegkà di kenagda, dodoo hemagawan di polo kagda kedu diyà sa tanà di.”

²Na, guwaen i Nemula ma diyà si Mosis, “Aken si Datù Nemula.

³Migpehaa a diyà si Ablaham owoy si Isak owoy si Hakob egoh anay. Tinulon ku diyà kenagda aken si Nemula épê dakel egkegaga. Dodoo endà igpehaa ku duu diyà kenagda sa kenemulawan ku nekeunut diyà sa ngadan ku si Datù Nemula. ⁴Igpasad ku ma sa kebegay ku diyà kenagda sa tanà Kanan sa kenà da mig-ugpà egoh iya, apiya di pa beken da tigtu etaw dahiya. ⁵Na, dinineg ku ma sa kesinegaw sa medoo tegeIslaél danà da inudipen sa tegeIgiptu, owoy netulengan ku ma sa igpasad ku diyà sa medoo tupù yu egoh anay.

⁶“Huenan di, tulon ko diyà sa medoo tegeIslaél sa kagi ku, guwaen ku, ‘Aken si Datù Nemula. Tigtu launen ku kiyu kedu diyà sa kepelehay sa medoo tegeIgiptu keniyu, owoy launen ku ma kiyu kedu diyà sa egoh yu neudipen diyà kenagda. Tigtu pigtamayan ku ma kagda danà sa dakel egkegaga ku owoy alukan ku ma kiyu. ⁷Tigtu ipaten ku kiyu i tegeIslaél, enù ka mebaluy dé kiyu sa etaw ku owoy aken sa Nemula egpigtuuwen yu. Amuk hediya, metiigan yu doo aken si Datù Nemula amuk launen ku kiyu kedu diyà sa kepelehay sa medoo tegeIgiptu keniyu. ⁸Owoy uwiten ku ma kiyu diyà sa tanà igpasad ku egoh anay ibegay diyà si Ablaham owoy si Isak owoy si Hakob. Tigtu ibegay ku diyà keniyu anì meniyo iya wé tanà. Mebaelan ku iya wé enù ka aken si Datù Nemula.’ ”

⁹Agulé tinulon i Mosis langun iya wé diyà sa medoo tegeIslaél, dodoo endà egpigtuuwen da duu enù ka egkesemek da dé danà di tigtu migkedaet sa lihay da.

¹⁰Agulé mig-ikagi Datù Nemula i diyà si Mosis, guwaen di, ¹¹“Angay ko dema tulon diyà si Palo sa datù diyà sa tanà Igiptu anì pandayaen di sa medoo tegeIslaél lumegkà kedu diyà sa tanà di.”

¹²Dodoo migsagbì Mosis i, guwaen di, “Endà pigtuuwen i Datù Palo duu kéen sa kagi ku. Enù ka amuk endà egpigtuu sa medoo duma ku tegeIslaél, labi pa egpigtuu Palo i, enù ka endà tigtu di metumàmà sa keikagi ku.”

Ini Sa Egoh I Nemula Migpepelikù Si Mosis Diyà Si Datù Palo

7 ¹Agulé mig-ikagi Datù Nemula i diyà si Mosis, guwaen di, “Taa ko, hih. Pelagaen ku kuna Nemula diyà sa kehaa i Palo. Owoy lagà tegesugkow ko sa kakay ko si Alon. ²Tulon ko diyà si Alon sa langun eg-ikagiyen ku diyà keniko. Hê, kagdi dema sa tumulon diyà si Palo anì pandayaen di sa medoo tegeIslaél lumegkà kedu diyà sa tanà di. ³Dodoo endà mebaluy di diyà kenagdi enù ka petegasen ku sa pedu di. Apiya di pa medoo sa panduan egkegaipan etaw egbaelan ku diyà sa tanà Igiptu, ⁴tapay doo endà migtuu di diyà keniyu. Huenan di, hauwen da sa kebulit ku egoh ku tigtu migtamay kenagda danà sa egkegaga ku, owoy uwiten ku ma kiyu kedu dutu, kiyu i etaw ku tegeIslaél. ⁵Agulé metiigan sa medoo tegelgiptu aken si Datù Nemula amuk hauwen da sa kepigtamay ku kenagda owoy amuk uwiten ku ma kiyu kedu diyà sa tanà da.”

⁶Na, pinangunutan i Mosis owoy si Alon doo sa langun igsugù i Datù Nemula diyà kenagda. ⁷Egoh da mig-angay eg-ikagi diyà si Palo, walu pulù gepalay dé sa kelukes i Mosis, owoy walu pulù owoy telu gepalay sa kakay di si Alon.

Ini Sa Egoh Di Nebaluy Uled Sa Tuked I Alon

⁸Na, ini ma sa kagi i Datù Nemula diyà si Mosis owoy si Alon, ⁹guwaen di, “Amuk isugù i Palo diyà keniyu anì baelan yu sa panduan sa tandà di kiyu sa pineangay ku, sugui ko diyà si Alon anì idugsù di sa tuked di diyà sa taengan i Palo anì mebaluy uled.”

¹⁰Huenan di, mig-angay da Mosis i diyà si Datù Palo owoy binaelan da sa igsugù i Datù Nemula diyà kenagda. Agulé igdugsù i Alon sa tuked di diyà sa taengan i Palo owoy sa medoo salu di. Hê, nebaluy dé uled. ¹¹Agulé igpeangay i Palo sa medoo milantek etaw tegeIgiptu owoy sa medoo tegebael balitmata. Egbaelan da ma sa lagà mendaa binaelan i Alon danà sa balakat da. ¹²Sigbaenbaenay da egdugsù sa hagda ma tuked owoy nebaluy ma uled. Dodoo inamah sa tuked i Alon sa langun tuked da nebaluy uled. ¹³Dodoo apiya di pa hinaa i Palo iya wé, egketegas doo sa pedu di owoy endà ma egpigtuu di diyà sa inikagi da i Mosis, lagà mendaa sa tinulon i Datù Nemula.

Ini Sa Egoh Di Nebaluy Depanug Sa Langun Lawa't Wayeg Diyà Igiptu

¹⁴Agulé guwaen i Datù Nemula diyà si Mosis, “Tigtu metegas pelà sa ulu i Palo, owoy endà pa egpandayaen di duu kiyu i etaw ku lumegkà.

¹⁵Huenan di, amuk sumimag, angay ko telabuk si Datù Palo amuk mangay wayeg dò owoy uwit ko ma siedò tuked yu atung egkebaluy uled. Angati ko diyà sa ilis sa wayeg Nilo. ¹⁶Ikagi ko diyà kenagdi, guwaen ko, ‘Si Datù Nemula sa egpigtuuwen ké, kami i etaw Hibelu, kagdi sa migpeangay kenak diyà keniko. Ini sa kagi di diyà keniko, guwaen di, peipanaw ko dé gaa sa medoo etaw di tegeIslaél anì mangay da sumimbà diyà kenagdi dutu siedò melabel tanà mediyù dalesan. Dodoo taman ini egoh di, endà egpigtuuwen ko duu sa kagi di. ¹⁷Huenan di, ini ma sa kagi i Datù Nemula. Duen gaa sa baelan di ini egoh di anì metiigan ko kagdi si Datù Nemula. Itapes ku siini tuked egsabaan ku diyà sa wayeg Nilo anì mebaluy depanug siini wayeg. ¹⁸Mematay sa langun sedà di, owoy memahù ma sa wayeg. Huenan di, endà mekeinem sa medoo tegeIgiptu sa wayeg di.’ ”

¹⁹Agulé guwaen i Datù Nemula diyà si Mosis, “Sugui ko diyà si Alon anì soyolen di sa tuked di diyà sa lawa't wayeg Nilo. Hediya ma sa baelan di diyà sa selatal sa medoo liyu lawa't wayeg anì mebaluy depanug sa langun wayeg diyà sa tanà Igiptu, iling ka sa wayeg egdelug ataw ka sa nesetebugtebug ataw ka sa kinuwa dé etaw. Apiya sa wayeg dalem sa buyung da owoy diyà sa liyu taguan, anan da ma mebaluy depanug.”

²⁰Agulé pinangunutan i Mosis owoy si Alon doo sa langun igsugù i Datù Nemula. Egsoyolen i Alon sa tuked di diyà sa taengan i Datù Palo owoy sa medoo salu di, owoy tinapes di ma sa wayeg Nilo. Hê, petow dé nebaluy depanug sa langun wayeg di. ²¹Nematay sa langun sedà owoy tigtu migkemahù ma sa wayeg. Huenan di sa medoo tegeIgiptu, endà dé egkeinem da duu. Hê, nebaluy dé depanug sa langun wayeg diyà sa tanà Igiptu.

²²Dodoo hediya ma sa binaelan sa medoo tegebael balitmata diyà Igiptu, enù ka binaluy da ma depanug sa wayeg danà sa balakat da. Huenan di, egketegas sa pedu i Palo owoy endà ma egpigtuuwen di duu sa kagi da i Mosis, lagà mendaa sa tinulon i Datù Nemula. ²³Agulé eglikù polo Datù Palo i, owoy endà egsagipaen di duu iya wé hinaa di. ²⁴Na, ini sa egbaelan sa medoo tegeIgiptu, egkalì da diyà sa ilis sa wayeg Nilo anì duen sa kenà da kumuwa wayeg, enù ka endà dé egkeinem da duu sa wayeg diyà sa lawa't wayeg Nilo.

Ini Sa Egoh Di Migsubela Sa Bakbak Diyà Sa Tanà Igiptu

²⁵Na, pitu dé agdaw migtalà egoh i Datù Nemula migbaluy depanug sa lawa't wayeg Nilo.

8 ¹Agulé mig-ikagi dema Datù Nemula i diyà si Mosis, guwaen di, “Angay ka dema tulon diyà si Datù Palo, guwaen ko diyà kenagdi, ‘Ini sa kagi i Datù Nemula, peipanaw ko gaa sa medoo etaw di anì mangay da sumimbà diyà kenagdi. ²Dodoo amuk endà lengaan ko duu

kagda, beleten di gaa sa medoo bakkak sa langun tanà ko. ³Pedoowen di gaa kagda temù diyà sa lawa't wayeg Nilo, huenan di gumaun da mangay diyà sa dalesan ko. Endà duen sa tayu kenà endà duen bakkak sa dalem dalesan ko ataw ka sa tudugan ko, enù ka anan dé bakkak. Hediya ma diyà sa medoo dalesan sa medoo salu ko owoy sa langun dalesan sa etaw tegeIgiptu. Lawayen ma bakkak sa apuyanan yu owoy sa bilu kenà yu egpelenuk epan. ⁴Lumaway da ma diyà keniko owoy diyà sa medoo salu ko owoy diyà sa langun etaw tegeIgiptu.’ ”

⁵Agulé mig-ikagi Datù Nemula i diyà si Mosis, guwaen di, “Tulon ko diyà si Alon anì soyolen di sa tuked di denu sa medoo lawa't wayeg owoy linaw anì gumaun sa medoo bakkak diyà sa langun tanà Igiptu.”

⁶Agulé sinoyol i Alon sa tuked di selatal sa langun wayeg diyà Igiptu. Hê, miggaun sa medoo bakkak, taman nebelet bakkak sa langun tanà Igiptu. ⁷Dodoo sa medoo tegebael balitmata, hediya ma sa egbaelan da, egpegaunen da ma sa medoo bakkak danà sa balakat da.

⁸Agulé igpeangay i Datù Palo Mosis i owoy si Alon. Egoh da migtebow, guwaen di diyà kenagda, “Simbai yu diyà si Datù Nemula anì kedanan di diyà kenami siini medoo bakkak. Amuk mekedan, pandayaen ku dé sa medoo etaw yu mipanaw anì mangay da mimatay sa hinagtay ibegay da diyà si Datù Nemula.”

⁹Migsagbi Mosis i diyà si Palo, guwaen di, “Ikagi ko daa diyà kenak nengan sa gai egoh ku sumimbà denu keniko owoy denu sa medoo salu ko owoy sa medoo etaw ko anì mekedan siini medoo bakkak diyà keniyu owoy diyà sa dalesan yu ma, liyu daa sa nesamà dutu siedò wayeg Nilo.”

¹⁰“Simag,” guwaen i Palo.

“Enù,” guwaen i Mosis, “baelan ku sa inikagi ko anì metiigan ko endà duen sa liyu nemula neketepeng si Datù Nemula sa egpigtuuwen ké.

¹¹Simag mekedan sa langun bakkak diyà sa dalesan ko lapeg diyà sa dalesan sa medoo salu ko owoy diyà sa medoo dalesan sa etaw ko ma, liyu daa sa mesamà dutu siedò wayeg Nilo.”

¹²Agulé egoh da i Mosis migsalid diyà si Palo, egsimbà Mosis i diyà si Datù Nemula anì kedanan di sa medoo bakkak pineangay di diyà si Palo.

¹³Binaelan i Datù Nemula doo sa pinegeni i Mosis. Hê, nematay sa langun bakkak diyà sa medoo dalesan etaw Igiptu owoy diyà sa duwangen da owoy diyà sa tinibah da ma. ¹⁴Dinugkow da siedò medoo bakkak nematay, owoy migkemahù sa uwang tanà Igiptu. ¹⁵Dodoo egoh i Palo mighaa nekedan dé iya wé kelikutan da, migketegas dema sa pedu di owoy endà dema egpigtuu di diyà si Mosis owoy si Alon, lagà mendaa sa inikagi i Datù Nemula.

Ini Sa Egoh Sa Medoo Beneboh Migsuluh Diyà Sa Tanà Igiptu

¹⁶Agulé mig-ikagi dema Datù Nemula i diyà si Mosis, guwaen di, “Sugui ko diyà si Alon anì ibalbal di sa tuked di diyà sa tanà, anì

mebaluy beneboh sa kepung diyà sa langun tanà Igiptu.” ¹⁷Agulé egoh i Alon migpeayaw sa tuked di, binalbal di sa tanà, hê nebaluy dé beneboh sa langun kepung diyà sa tanà Igiptu. Huenan di, sa langun etaw owoy hinagtay ma, anan dé egbenebohen sa lawa da. ¹⁸Egtukaw da ma egbael hedem sa medoo tegebael balitmata danà sa balakat da, dodoo endà egkegaga da duu egbaluy beneboh sa kepung. Tigtu egkepasangan sa langun etaw owoy sa medoo hinagtay da ma danà sa medoo beneboh.

¹⁹Agulé mig-ikagi sa medoo tegebael balitmata diyà si Palo, guwaen da, “Endà duen sa mekebael éhê ini i amuk beken si Nemula daa.” Dodoo tapay doo metegas sa pedu i Palo, huenan di endà ma egpigtuuwen di duu, lagà mendaa sa inikagi i Datù Nemula.

Ini Sa Egoh Sa Medoo Langaw Migsuluh Diyà Sa Tanà Igiptu

²⁰Agulé mig-ikagi Datù Nemula i diyà si Mosis, guwaen di, “Lapus ka enaw simag anì telabuken ko dema Palo i amuk mangay wayeg dò. Tulon ko diyà kenagdi siini kagi ku, guwaen ko, ‘Ini sa kagi i Datù Nemula, peipanaw ko gaa sa medoo etaw di anì mangay da sumimbà diyà kenagdi. ²¹Dodoo amuk endà lengaan ko duu kagda, peangayen di gaa sa langaw tigtu medoo diyà keniko lapeg diyà sa medoo salu ko owoy diyà sa langun etaw ko ma. Mesuluh langaw sa medoo dalesan sa tegeIgiptu owoy sa langun kenà da eg-utuh. ²²Dodoo amuk meuma iya wé, tigesaa gaa sa baelan di diyà sa uwang tanà Gosen kenà da eg-ugpà sa medoo etaw di. Endà dumuen sa langaw dutu, apiya sebaen, anì metiigan ko gaa kagdi si Datù Nemula sa eggsabà ma siini tanà ko. ²³Sengayen di gaa sa mebaelan sa medoo etaw di owoy sa medoo etaw ko ma. Na, simag gaa sa egoh di mael siini egkegaipan etaw.’ ”

²⁴Agulé igpetuu i Datù Nemula dé sa inikagi di. Petow dé migtebow sa tigtu medoo langaw owoy eg-awuh da diyà sa dalesan i Palo owoy diyà sa medoo dalesan sa salu di. Medoo sa nedaetan diyà sa tanà Igiptu danà sa medoo langaw.

²⁵Agulé igpeangay i Datù Palo Mosis i owoy si Alon. Egoh da migtebow, guwaen di diyà kenagda, “Angay yu imatay sa hinagtay ibegay yu diyà sa Nemula yu, dodoo dahini daa diyà sa tanà Igiptu.”

²⁶Dodoo migsagbi Mosis i, guwaen di, “Endà mebaluy di amuk dahini diyà Igiptu sa kenà ké mimatay sa hinagtay ibegay ké diyà si Datù Nemula sa egpigtuuwen ké, enù ka tigtu melihi diyà sa medoo tegeIgiptu sa balangan hinagtay sumbalien ké. Amuk dahini sa kenà ké egbael sa melihi diyà sa kehaa da, buungen da kami batu anì mematay ké. ²⁷Huenan di, mekeipanaw ké taman telu agdaw anì mangay ké dutu siedò melabel tanà mediyù dalesan enù ka dutu sa kenà ké mimatay sa ibegay ké diyà si Datù Nemula sa egpigtuuwen ké, enù ka iya sa igsugù di diyà kenami.”

²⁸Agulé guwaen i Palo, “Mebaluy doo peipanawen ku kiyu mangay dutu siedò melabel tanà mediyù dalesan anì mimatay yu sa hinagtay ibegay yu diyà si Datù Nemula sa egpigtuuwen yu, asal endà tigtu yu pediyù temù. Na, simbai yu aken.”

²⁹Migsagbì Mosis i, guwaen di, “Amuk salidan ku kuna, sumimbà a diyà si Datù Nemula anì mekedan simag sa langun langaw diyà keniko lapeg diyà sa medoo salu ko owoy diyà sa medoo etaw ko ma. Dodoo yaka dema eg-uman eg-akal kenami danà ko eghawid kenami eg-angay eg-imatay sa hinagtay ibegay ké diyà si Datù Nemula.”

³⁰Na, egoh da migsalid diyà si Palo, egsimbà dema Mosis i diyà si Datù Nemula. ³¹Binaelan i Datù Nemula dema sa pinegeni i Mosis. Hê, nekedan dé sa langun langaw diyà si Palo owoy diyà sa medoo salu di owoy diyà sa medoo etaw di ma. Endà duen sa nesamà, apiya sebaen. ³²Dodoo migketegas dema sa pedu i Palo, owoy endà egpandayaen di duu sa medoo tegeIslaél mipanaw.

Ini Sa Egoh Di Nematay Sa Medoo Hinagtay Diyà Sa Tanà Igiptu

9 ¹Agulé mig-ikagi Datù Nemula i diyà si Mosis, guwaen di, “Angay ka dema tulon diyà si Datù Palo, guwaen ko diyà kenagdi, ‘Ini sa inikagi i Datù Nemula sa egpigtuuwen sa medoo etaw Hibelu. Peipanaw ko gaa sa medoo etaw di mangay sumimbà diyà kenagdi. ²Dodoo amuk endà dema lengaan ko duu kagda mipanaw owoy eg-umanen ko kagda eghawid, ³pigtamayan di dema gaa kiyu. Peangayen di gaa sa tigtu mepasang linadu diyà sa langun hinagtay yu, iling ka kudà ataw ka asnu ataw ka kamiliyu ataw ka sapì ataw ka kebilibili ataw ka kambing. ⁴Dodoo sengayen di gaa sa mebaelan sa medoo hinagtay yu owoy sa medoo hinagtay sa tegeIslaél. Endà duen sebaen hinagtay da mematay.’” ⁵Na, tapay dé inatasan i Datù Nemula, guwaen di, “Simag sa egoh ku mael ini i diyà sa uwang tanà Igiptu.”

⁶Agulé egoh di umenaw simag, igpetuu i Datù Nemula dé sa tinulon di. Hê, petow dé negelà nematay sa hinagtay sa etaw tegeIgiptu. Dodoo apiya sebaen, endà duen nematay diyà sa medoo hinagtay sa tegeIslaél. ⁷Agulé sinugù i Datù Palo sa etaw di anì telowen da sa medoo hinagtay sa tegeIslaél. Tuu ma doo, endà duen sa hinagtay da nematay, apiya sebaen. Dodoo apiya di pa hediya sa nebaelan, tapay doo metegas sa pedu i Palo, owoy endà ma egpandayaen di duu sa medoo tegeIslaél mipanaw.

Ini Sa Egoh Di Nekesuluh Sa Buladut Diyà Sa Medoo TegeIgiptu

⁸Agulé mig-ikagi dema Datù Nemula i diyà si Mosis owoy si Alon, guwaen di, “Ekup yu sa abuh diyà sa dakel apuyanan, owoy si Mosis sa sumawel diyà awang diyà sa taengan i Palo. ⁹Mebaluy melalimet kepung

iya wé abuh anì mekeseluh diyà sa langun tanà Igiptu, anì dumuen sa buladut diyà sa langun etaw lapeg sa medoo hinagtay da ma.”

¹⁰Huenan di, migkuwa da medoo abuh diyà sa dakel apuyanan owoy mig-angay da diyà si Datù Palo. Egoh da migtebow, igsawel i Mosis sa abuh diyà awang. Hê, migduen sa medoo buladut diyà sa langun etaw tegeIgiptu owoy diyà sa langun hinagtay da ma. ¹¹Apiya sa medoo tegebael balitmata, endà ma dé egpekeangay da egtaeng diyà si Mosis enù ka anan da épê buladut lagà mendaa sa langun etaw tegeIgiptu. ¹²Dodoo pinetegas i Datù Nemula doo tapay sa pedu i Palo anì endà egsagipaen di duu sa inikagi da i Mosis, lagà mendaa sa inikagi i Datù Nemula diyà si Mosis.

Ini Sa Egoh Sa Bunga't Udan Migdagpak Diyà Sa Tanà Igiptu

¹³Agulé mig-ikagi dema Datù Nemula i diyà si Mosis, guwaen di, “Lapus ka enaw simag, telabuk ko dema Palo ya owoy tulon ko diyà kenagdi siini kagi ku, aken i Datù Nemula sa egpigtuuwen sa medoo Hibelu. Guwaen ko, ‘Pandayà ko dé gaa sa medoo etaw i Nemula anì mangay da sumimbà diyà kenagdi. ¹⁴Dodoo amuk endà dema pandayaen ko duu kagda, tigtu pigtamayan di gaa kuna lapeg sa medoo salu ko owoy sa langun etaw ko tegeIgiptu. Baelan di gaa iya wé anì metiigan ko endà duen sa liyu épê egkegaga diyà siini sinukub langit meketepeng diyà kenagdi. ¹⁵Enù ka amuk peangayen di gaa sa dakel linadu mekepatay diyà keniyu, meimet yu dé hedem mematay. ¹⁶Dodoo endà pelà baelan di duu iya wé, enù ka ungayà di gaa polo kuna pelà sa datù diyà Igiptu anì mehaa ko sa dakel egkegaga di egoh di migtamay keniyu owoy anì lumalag ma diyà sa langun etaw diyà siini sinukub langit. ¹⁷Dodoo tapay ka doo pelawà egpebagelbagel, huenan di endà egpeipanawen ko duu sa medoo etaw di. ¹⁸Huenan di, simag lapus peudanen i Nemula sa meleges bunga't udan mekeiling batu diyà sa uwang tanà Igiptu. Edung egoh anay taman ini egoh di, endà pa duen sa hinaa diyà Igiptu éhê siini meleges bunga't udan. ¹⁹Huenan di, sugui ko anì ipehelung da sa medoo hinagtay yu, enù ka sa langun endà nekepehelung, iling ka etaw ataw ka hinagtay, anan da mematay amuk mesugat da siini bunga't udan.’ ”

²⁰Na, egpesu sa duma salu i Palo danà da migdineg sa kagi i Datù Nemula tinulon i Mosis. Huenan di, migpetéél da eg-angay egpehelung sa medoo udipen da owoy sa medoo hinagtay da ma. ²¹Dodoo sa medoo duma salu di, endà sinagipà da duu iya wé kagi i Datù Nemula, huenan di egpandayaen da sa medoo udipen da owoy sa medoo hinagtay da diyà sa liyu.

²²Agulé guwaen i Datù Nemula diyà si Mosis, “Begeng ko sa belad ko petodoi ko diyà langit anì menabù sa bunga't udan diyà sa medoo etaw owoy diyà sa medoo hinagtay da owoy diyà sa langun hinemula

da diyà sa uwang tanà Igiptu.” ²³Agulé sinoyol i Mosis sa tuked di. Hê, migsilà owoy migpeletê ma danà i Datù Nemula, owoy mig-udan ma dé sa metegas bunga't udan diyà sa uwang tanà Igiptu. ²⁴Tigtu meleges iya wé bunga't udan, owoy nekebensek ma sa silà. Endà pa duen sa meleges udan hinaa éhê iya wé edung sa egoh sa tanà Igiptu migduen. ²⁵Na, sa langun etaw ataw ka hinagtay endà nekehelung diyà sa tanà Igiptu, anan da dé nematay danà da nesugat sa bunga't udan. Medoo ma sa nedaetan, enù ka sumalà dé sa nesugat di, anan da nedaetan, iling ka hinemula ataw ka kayu. ²⁶Iya daa sa endà neumawan bunga't udan sa uwang tanà Gosen kenà sa medoo tegeIslaél eg-ugpà.

²⁷Agulé igpeangay i Palo Mosis i owoy si Alon. Guwaen di diyà kenagda, “Nesalà a dé ini egoh di. Tigtu metudà sa binaelan i Datù Nemula, dodoo kami i etaw tegeIgiptu sa épê salà. ²⁸Huenan di, simbai yu diyà si Datù Nemula anì kumedit siini meleges bunga't udan owoy anì sumabuh ma sa kepeletê di, enù ka endà dé egpekegaga ké. Peipanawen ku dé kiyu anì endà dé mekeugpà yu dahini.”

²⁹Migsagbì Mosis i, guwaen di, “Amuk sumalid a diyà siini menuwa yu, begengen ku sa belad ku amuk sumimbà a diyà si Datù Nemula anì sumabuh sa peletê owoy kumedit ma siini bunga't udan, anì metiigan ko si Datù Nemula daa sa egsabà sa langun uwang tanà. ³⁰Dodoo netiigan ku doo kuna owoy sa medoo salu ko, endà pelà eg-adatan yu duu Datù Nemula i.”

³¹Na, danà iya wé bunga't udan, tigtu nedaetan sa langun hinemula da lino owoy sebada, enù ka netipon diatas dé sa sebada owoy egbulok dé sa lino. ³²Dodoo endà nedaetan sa hinemula da teligo owoy espelta^f enù ka hudihudi da egkelegà.

³³Na, egoh i Mosis migsalid diyà si Palo, miglaun kedu diyà sa menuwa. Agulé binegeng di sa belad di egsimbà diyà si Datù Nemula. Hê, migsabuh sa peletê owoy migkedit ma sa bunga't udan owoy sa udan ma. ³⁴Dodoo egoh i Palo mighaa migkedit sa bunga't udan owoy migsabuh ma dé sa peletê, migbael dema salà. Migketegas dema sa pedu da lapeg sa medoo salu di. ³⁵Huenan di, endà lengaan di duu sa medoo tegeIslaél mipanaw, lagà mendaa sa kagi i Datù Nemula igsugkow i Mosis.

Ini Sa Egoh Sa Medoo Kasuk Migsuluh Diyà Sa Tanà Igiptu

10 ¹Agulé mig-ikagi dema Datù Nemula i diyà si Mosis. Guwaen di, “Angay ka dema diyà si Palo, enù ka pinetegas ku sa pedu di owoy sa pedu sa medoo salu di anì mebaelan ku diyà kenagda siini medoo panduan egkegaipan etaw. ²Iya sa baelan ku anì tulonen yu diyà sa medoo tugod yu sa egoh ku migpelihay sa medoo tegeIgiptu egoh ku

^f 9:32 Espelta sa sebaen balangan teligo endà iseg di mepion.

migbael diyà kenagda siini medoo panduan egkegaipan etaw, owoy anì meketiig yu langun aken si Datù Nemula.”

³Huenan di, mig-angay dema Mosis i owoy si Alon diyà si Palo. Guwaen da diyà kenagdi, “Ini sa kagi i Datù Nemula sa egpigtuuwen ké, kami i etaw Hibelu. Nengan pa gaa sa egoh ko petukééy diyà kenagdi? Pandayà ko dé gaa sa medoo etaw di mipanaw anì sumimbà da diyà kenagdi. ⁴Dodoo amuk endà pelà pandayaen ko duu kagda, peangayen di gaa sa kasuk tigtu medoo diyà sa tanà yu simag. ⁵Tigtu medoo da temù, huenan di amuk tumenà da, endà hauwen sa tanà. Kaenen da sa langun hinemula yu endà nedaetan di danà siedò bunga't udan, owoy kaenen da ma sa medoo daun kayu. ⁶Mesuluh kasuk sa dalesan ko owoy sa medoo dalesan salu ko owoy sa langun dalesan sa tegelIgiptu. Edung egoh anay taman ini egoh di, endà nehàa di sa medoo tupù yu sa medoo kasuk éhê ini i mehaa yu.” Iya sa tinulon da i Mosis diyà si Palo, agulé sinalidan da dé.

⁷Agulé mig-ikagi sa medoo salu i Palo diyà kenagdi, guwaen da, “Ngadan taman sa lugay ta mebogo danà siini etaw? Huenan di, peipanaw ko dé sa medoo tegelslaél mangay sumimbà diyà si Datù Nemula sa egpigtuuwen da. Enù di ya, endà pa egketiigan ko duu atu nedaetan dé sa langun tanà Igiptu?”

⁸Huenan di, pinepelikù i Palo dema Mosis i owoy si Alon. Egoh da migtebow, guwaen di diyà kenagda, “Ipanaw yu dé, angay yu simbà diyà si Datù Nemula sa egpigtuuwen yu. Dodoo ngadan tayu di etaw sa mangay sumimbà?”

⁹Migsagbi Mosis i, guwaen di, “Langun ké doo sa mangay sumimbà, sa medoo batà owoy lukes etaw, bayi owoy maama, lapeg sa medoo hinagtay ké ma, enù ka mangay ké mista diyà si Datù Nemula.”

¹⁰Mig-ikagi Palo i, guwaen di, “Na, metabangan doo i Datù Nemula kiyu amuk pandayaen ku kiyu langun mipanaw. Dodoo endà eglengaan ku duu kiyu amuk uwiten yu sa sawa yu owoy sa medoo anak yu, enù ka netiigan ku duen sa ungayà yu endà mepion di. ¹¹Iya daa sa peipanawen ku sa medoo maama. Angay yu dé simbà diyà si Datù Nemula amuk iya sa ungayà yu.” Na, egoh di mig-ikagi iya wé, hinemagawan di Mosis i owoy si Alon kedu diyà sa taengan di.

¹²Agulé mig-ikagi dema Datù Nemula i diyà si Mosis, guwaen di, “Begeng ko dé sa belad ko anì tumebow sa tigtu medoo kasuk diyà sa uwang tanà Igiptu, anì kaenen da sa langun hinemula sa endà nedaetan di danà sa bunga't udan.”

¹³Huenan di, sinoyol i Mosis sa tuked di. Agulé pinekelamag i Datù Nemula kedu diyà sa tebowon agdaw. Neelut agdaw owoy neelut sigep sa kekelamag di dutu Igiptu dò. Hê, egoh di umenaw simag, migpeunut sa tigtu medoo kasuk diyà sa kelamag. ¹⁴Tigtu medoo da temù migtenà

diyà sa uwang tanà Igiptu. Edung egoh anay taman meuma sa sabuhanan agdaw, endà dé duen sa hauwen ta éhê iya wé kedoo kasuk. ¹⁵Egoh da migtenà, migkeitem sa tanà danà sa kedoo da. Agulé kinaen da sa langun hinemula endà nedaetan di danà sa bunga't udan, lapeg sa langun bunga kayu ma. Endà duen sebaen mehilaw daun nesamà diyà sa langun tanà Igiptu.

¹⁶Agulé medelamet igpeangay i Palo dema Mosis i owoy si Alon. Egoh da migtebow, guwaen di, “Nesalà a dema diyà si Datù Nemula sa epgigtuuwen yu owoy diyà keniyu ma. ¹⁷Na, peuloyi yu dema aken, owoy simbà yu ma diyà si Datù Nemula anì kedanan di diyà kenak siini tigtu dakek lihay.”

¹⁸Agulé sinalidan da i Mosis Palo i owoy migsimbà diyà si Datù Nemula. ¹⁹Hê, pineleges i Nemula dema sa kelamag kedu diyà sa eledan agdaw. Nelayap siedò langun kasuk nekeangay dutu siedò dagat pinengadanan da Melalegà Dagat. Endà dé duen sa kasuk nesamà diyà sa uwang tanà Igiptu. ²⁰Dodoo pinetegas i Datù Nemula dema sa pedu i Palo, huenan di endà doo lengaan di duu sa medoo tegeIslaél mipanaw.

Ini Sa Egoh Di Migdeleman Sa Tanà Igiptu

²¹Agulé mig-ikagi dema Datù Nemula i diyà si Mosis, guwaen di, “Begeng ko sa belad ko petodoi ko diyà langit anì tigtu dumeleman sa uwang tanà Igiptu.” ²²Huenan di, egoh i Mosis migbegeng sa belad di, tigtu migdeleman sa uwang tanà Igiptu taman telu agdaw. ²³Endà egkesehaa sa medoo tegelgiptu, owoy taman telu agdaw ma sa lugay da endà eglauun diyà sa dalesan da. Dodoo meilag doo sa kenà sa medoo tegeIslaél eg-ugpà.

²⁴Agulé igpeangay i Palo dema Mosis i, owoy guwaen di, “Angay yu dé simbà diyà si Datù Nemula. Uwit yu ma dé sa sawa yu owoy sa medoo anak yu ma. Dodoo iya daa sa tangtang yu sa medoo hinagtay yu.”

²⁵Dodoo migsagbi Mosis i, guwaen di, “Pewiti ko ma dé kenami sa medoo hinagtay ké, enù ka iya sa ulowen ké sa ibegay ké diyà si Datù Nemula amuk sumimbà ké. ²⁶Huenan di, uwiten ké ma doo sa langun hinagtay ké. Endà duen sebaen tangtangen ké. Enù ka amuk sumimbà ké, hemilien ké sa ibegay ké diyà si Datù Nemula, dodoo endà pelà netiigan ké duu ngadan tayu sa kenà di metuuan taman endà mekeuma ké dutu.”

²⁷Dodoo danà i Datù Nemula migpetegas sa pedu i Palo, huenan di endà doo egpeipanawen di duu sa medoo tegeIslaél. ²⁸Agulé inikagiyan i Palo Mosis i, guwaen di, “Yoko dé egdahiya ya, owoy yoko ma dé egpelikù ya diyà kenak. Amuk hauwen ku dema kiyu dahini, iya ma dé sa agdaw egoh yu mematay.”

²⁹Guwaen i Mosis, “Meketuu doo sa ungayà ko. Endà dé pehaa a diyà keniko uman taman melugay.”

**Ini Sa Egoh I Mosis Migtulon Sa Mebaelan Sa
Langun Lebì Lawa Diyà Tanà Igiptu**

11 ¹Na, mig-ikagi Datù Nemula i diyà si Mosis, guwaen di, “Duen sa sebaen ma lihay peangayen ku diyà si Palo owoy diyà sa langun etaw tegeIgiptu. Amuk meubus iya wé, peipanawen di dé kiyu. Dodoo beken daa sa kepeipanaw di keniyu, hemagawan di pa kiyu langun. ²Huenan di, ikagi ko diyà sa langun tegeIslaél, maama owoy bayi, anì mangay da diyà sa medoo duma da nessedapag dalesan tegeIgiptu anì pegeniyen da sa medoo imu-imu binaelan da bulawan owoy pilak.” ³Na, pinepion i Datù Nemula sa pedu sa medoo tegeIgiptu diyà sa medoo tegeIslaél. Owoy eg-adatan ma sa langun tegeIgiptu lapeg sa medoo salu i Palo Mosis i.

⁴Na, egoh i Mosis endà pa migsalid diyà si Palo, guwaen di diyà kenagdi, “Ini ma sa inikagi i Datù Nemula. Amuk buyu dé teliwadà sigep, mipanawpanaw gaa diyà sa uwang tanà Igiptu. ⁵Owoy mematay sa langun maama lebì lawa diyà sa uwang tanà Igiptu, umedung diyà sa lebì lawa anak i Palo sa sumetugdug hedem kumedatù taman sa lebì lawa anak sa bayi udipen tegegiling owoy sa langun anay anak sa medoo hinagtay yu, anan da doo mematay. ⁶Dumuen sa tigtu metaled dumelawit diyà sa uwang tanà Igiptu. Edung egoh anay taman melugay, endà dé duen sa dinegen metaled kedelawit éhê iya wé. ⁷Dodoo diyà sa kenà sa medoo tegeIslaél, endà duen sa egdagì, apiya sa kegebu tuyang egdinegen da. Amuk hediya, metiigan ko doo tigesà sa egbaelan i Datù Nemula diyà sa medoo tegeIslaél owoy diyà sa medoo tegeIgiptu.” ⁸Eg-uman Mosis i eg-ikagi, guwaen di, “Na, siini medoo salu ko, mangay da doo diyà kenak owoy lumigkued da diyà sa taengan ku enù ka isugù da sa kelegkà ké, lapeg sa langun etaw ku. Amuk hediya, iya dé sa egoh ké lumegkà diyà keniyu.” Agulé tigtu egbulit Mosis i egsalid diyà si Palo.

⁹Na, iya sa inikagi i Datù Nemula diyà si Mosis, guwaen di, “Endà doo egdinegdinegen i Palo duu sa inikagi ko anì mebaelan ku uman sa medoo egkegaipan etaw diyà sa tanà Igiptu.” ¹⁰Huenan di, apiya di pa binaelan i Mosis owoy si Alon sa medoo egkegaipan etaw diyà sa taengan i Palo, endà doo eglengaan di duu sa medoo tegeIslaél lumegkà kedu diyà sa tanà di, enù ka pinetegàs i Datù Nemula sa pedu di.

Ini Sa Ukit Kebaël Da Sa Pista Kinetalà Sa Kepigtamay I Nemula

12 ¹Na, mig-ikagi Datù Nemula i diyà si Mosis owoy si Alon diyà sa tanà Igiptu. ²Guwaen di, “Siini bulan, ini dé sa muna bulan diyà sa palay yu. ³Tului yu ini i diyà sa langun tegeIslaél. Amuk meuma sa kesepulù di agdaw diyà siini muna bulan, hemilien sa ulu-ulu diyà sa uman sebaen malayan sa nati kebilibili ataw ka nati kambing, anì iya sa

dulisan da. ⁴Dodoo amuk duen sa malayan endà iseg da medoo owoy endà tolol da duu meimet sa sebaen kebilibili, mebaluy seamutay da kumaen sa sebaen ma malayan anì meimet da sa sebaen nati kebilibili inilegà da. Peatu-atuwi ko kenagda sa kedoo da kumaen sa uman sebaen nati kebilibili anì meimet da. ⁵Na, sa hinagtay hemilien yu, sa maama daa owoy segepalay dé miglesut, owoy sa tigtu mepion endà duen kulang diyà sa lawa di. Mebaluy ma doo humemilì yu diyà sa kebilibili ataw ka sa kambing. ⁶Pepion yu ipat taman meuma sa kesepulù di owoy epat agdaw diyà siini bulan. Agulé amuk buyu dé sumalep sa agdaw diyà sa kesepulù di owoy epat agdaw, sumbalien dé sa medoo tegelIsaél sa hinagtay hinemilì da. ⁷Amuk sinumbalì da dé, kumuwa da sa depanug owoy idulét da diyà sa lekeatas sa selat owoy diyà sa duwa kilidan di, sumalà dé sa dalesan kenà da mael sa pista. ⁸Tuegen da daa sa kaleni di owoy kaenen da ma dé diyà iya wé sigep. Ini ma sa kaenen da sa tinabel mepait owoy sa epan endà duen ipelenuk di. ⁹Yoko egkaen duu sa kaleni endà nelegà di, owoy yoko ma egtabel duu. Tueg yu daa sa langun lawa di, lapeg sa dalem getek di. ¹⁰Yoko ma egsamà duu taman umenaw simag. Amuk duen sa nesamà yu egkaen, ulow yu dé. ¹¹Ini ma sa adat amuk kumaen yu. Petéél yu sa kekaen yu, owoy kawal yu ma sa ginis yu eg-ipanaw, owoy talumpà yu ma owoy sabai yu ma sa tuked yu. Ini sa kepengadan siini pista, sa Pista Kinetalà Sa Kepigtamay i Nemula.”

¹²Guwaen i Nemula, “Amuk meuma iya wé sigep, mipanawpanaw a diyà sa uwang tanà Igiptu. Imatayan ku sa langun maama lebi lawa diyà kenagda, iling ka etaw ataw ka hinagtay, owoy pigtamayan ku ma sa langun egpenemulawen da diyà Igiptu, enù ka aken si Datù Nemula. ¹³Amuk duen hauwen ku depanug igdulét yu diyà sa selat sa dalesan yu, tumalà a daa diyà keniyu. Enù ka sa depanug, iya sa tandà sa dalesan yu, huenan di talaen ku kiyu anì endà mekelapeg yu diyà sa kepigtamay ku sa medoo tegelgiptu.

¹⁴“Edung ini egoh di, pistawi yu siini agdaw uman palay anì metulengan yu aken i Datù Nemula owoy sa binaelan ku egoh ku migtalà diyà keniyu. Uman palay baeli yu siini pista taman melugay.”

Ini Sa Igtulù Di Denu Sa Pista Egoh Da Egkaen Sa Epan Endà Duen Ipelenuk Di

¹⁵Na, guwaen ma i Nemula, “Amuk umenaw simag sa egoh yu neubus migtueg sa nati kebilibili, iya daa sa kaen yu taman pitu agdaw sa epan endà duen igpelenuk di. Huenan di, amuk meuma sa muna agdaw di, kedani yu dé sa langun ipelenuk epan diyà sa dalesan yu. Enù ka sumalà dé sa etaw kumaen sa epan duen igpelenuk di taman siini pitu agdaw, kagdi dé lagà sa etaw beken tugod i Isaél. ¹⁶Amuk sa muna agdaw diyà siini pista owoy sa kepitu di agdaw ma, setiponoy yu langun anì sumimbà

yu diyà kenak. Yoko eggalebek ka diyà siini medoo agdaw, liyu daa sa keilegà yu sa medoo kaenen yu. ¹⁷Edung ini egoh di taman melugay, baeli yu dé siini pista sa egoh yu egkaen sa epan endà duen ipelunuk di anì metulengan yu ini sa agdaw egoh ku miglaun keniyu kedu diyà sa tanà Igipitu.”

Ini Sa Egoh I Nemula Migtalà Sa Dalesan Dinulétén Depanug Kebilibili

²¹Agulé sinetipon i Mosis sa medoo ulu-ulu tegeIslaél owoy inikagiyan di kagda, guwaen di, “Ini sa baeli yu, angay yu hemilì sa medoo hinagtay, iling ka nati kebibili ataw ka nati kambing, owoy sumumbali sa uman sebaen malayan anì kumaen da enù ka pistawan da sa Kinetalà Sa Kepigtamay i Nemula. ²²Amuk sumbalien yu dé, toyo yu sa depanug di diyà sa bilu. Agulé begkes yu sa medoo tukééy panga sa hinemula hisop owoy damui yu diyà sa depanug diyà sa bilu, agulé duléti yu diyà sa lekeatas selat owoy diyà sa duwa kilidan di ma. Yoko eglaun na diyà sa dalesan yu taman sumimag. ²³Enù ka amuk mipanawpanaw Datù Nemula i diyà sa uwang tanà Igipitu anì imatayan di sa langun lebi lawa diyà kenagda, hauwen di doo sa depanug igdulét yu diyà sa selat, huenan di talaen di sa medoo dalesan yu. Hawidan di sa egsugùsuguen di tegeimatay umawuh diyà sa dalesan yu.”

²⁴Guwaen i Mosis, “Na, kiyu owoy sa medoo tugod yu, pangunuti yu dé siini igtulù taman melugay. ²⁵Amuk tumbow yu diyà sa tanà igpasad i Datù Nemula ibegay diyà keniyu, baeli yu takà siini kepista uman palay. ²⁶Amuk igsaan sa anak yu kiyu sa pesuwan yu egbael iya wé, ²⁷tuloni yu kagda, guwaen yu, Siini kebibili egsumbalien ta diyà sa Pista Sa Kinetalà Sa Kepigtamay i Nemula, iya sa ibegay ta amuk sumimbà ki diyà si Datù Nemula. Enù ka tinalà di sa medoo dalesan sa tegeIslaél dutu Igipitu dò egoh di mig-imatay sa medoo lebi lawa sa tegeIgiptu.”

Na, egoh i Mosis mig-ikagi iya wé, egligkued sa medoo tegeIslaél enù ka eg-oloen da Datù Nemula i. ²⁸Agulé egoh da miglikù, pinangunutan da iya wé igsugù i Datù Nemula igsugkow da i Mosis diyà kenagda.

Ini Sa Egoh Da Nematay Sa Medoo Lebi Lawa Diyà Sa Tanà Igipitu

²⁹Na, egoh di teliwadà sigep dé, inimatayan i Datù Nemula sa langun maama lebi lawa diyà sa tanà Igipitu, edung diyà sa lebi lawa anak i Palo sa sumetugdug hedem kumedatù taman sa lebi lawa anak sa etaw nebilanggu owoy sa langun anay anak sa medoo hinagtay da ma, anan da nematay. ³⁰Egoh iya wé sigep, mig-enaw Palo i owoy sa medoo salu di owoy sa langun etaw tegeIgiptu. Tigtu metaled sa kedelawit da diyà sa uwang tanà Igipitu, enù ka sa langun dalesan duen sa minematay.

³¹Hè, egoh iya wé sigep, igpeangay i Palo Mosis i owoy si Alon. Egoh da migtebow, guwaen di, “Ipanaw yu dé, kiyu i medoo tegeIslaél. Legkà

yu dé diyà sa tanà ké. Angay yu simbà diyà si Datù Nemula, enù ka iya sa pinegeni yu. ³²Owoy uwit yu ma sa langun hinagtay yu. Na, ipanaw yu dé. Owoy simbai yu ma aken i anì metabangan a i Nemula.”

Ini Sa Egoh Sa Medoo TegeIslaél Miglegkà Diyà Sa Tanà Igiptu

³³Agulé, linakawan sa medoo tegeIgiptu egpeipanaw sa medoo tegeIslaél anì pedelamet da dé lumegkà diyà sa tanà Igiptu. Guwaen da, “Amuk endà mapes yu mekelegkà, meimet ké mematay.” ³⁴Huenan di, egpesiyapat sa medoo tegeIslaél egtipoh sa medoo langun taman da. Dinalam da sa egbaelan da epan endà pa duen ipelenuk di diyà sa taguan epan, owoy binekut da ma ginis owoy tiniang da egoh da eg-ipanaw. ³⁵Pinangunutan sa medoo tegeIslaél sa igtulù i Mosis diyà kenagda enù ka migpegeni da diyà sa medoo tegeIgiptu sa medoo imu-imu binaelan da bulawan owoy pilak owoy sa medoo ginis ma. ³⁶Pinepion i Datù Nemula sa pedu sa medoo tegeIgiptu diyà sa medoo tegeIslaél, huenan di igbegay da doo sumalà dé sa egpegeniyen da. Huenan di, lagà kinedanan da sa medoo langun taman sa tegeIgiptu.

³⁷Agulé, miglegkà sa medoo tegeIslaél diyà sa menuwa Lamésis eg-angay diyà sa menuwa Sukot. Medoo da temù eg-ipanaw, enù ka sa kedoo maama daa duen kéen enem pulù lagsà, liyu pa sa medoo bayi owoy batà. ³⁸Owoy beken iya daa, enù ka duen ma sa medoo etaw beken tegeIslaél eg-unut diyà kenagda, owoy eg-uwiten da ma sa tigtu medoo hinagtay da.

³⁹Agulé egoh da mig-etud anì kumaen da, dinangay da sa kebael da epan endà duen ipelenuk di sa inuwit da kedu Igiptu dò. Endà dé neamutan da duu sa ipelenuk epan enù ka nebugbug da danà da hinemagawan kedu Igiptu dò, owoy endà ma neketapay da sa legà da enù ka endà duen ulas da.

⁴⁰Na, epat gatus owoy telu pulù gepalay sa lugay sa medoo tegeIslaél mig-ugpà diyà sa tanà Igiptu. ⁴¹Agulé egoh di neuma sa epat gatus telu pulù gepalay, iya ma dé sa agdaw egoh sa langun etaw i Datù Nemula miglegkà diyà tanà Igiptu. ⁴²Sigep sa egoh i Datù Nemula migtulik kenagda egoh da mig-ipanaw eglegkà kedu Igiptu dò. Huenan di, uman palay taman melugay amuk meuma dema iya wé sigep, iya sa egoh sa medoo tegeIslaél egbael pista anì oloen da Datù Nemula i danà di miglaun kenagda kedu Igiptu dò.

Ini Sa Igtulù Denu Sa Pista Kinetalà Sa Kepigtamay I Nemula

⁴³Agulé mig-ikagi Datù Nemula i diyà si Mosis owoy si Alon, guwaen di, “Ini sa medoo uledin ku denu sa Pista Sa Kinetalà Sa Kepigtamay i Nemula. Endà mebaluy di amuk kumaen sa etaw beken tegeIslaél siini pista. ⁴⁴Dodoo amuk duen sa udipen bineli yu, mebaluy doo kumaen

da siini pista amuk nekelaingan da ipat, enù ka lagà da dé diyà sa malayan yu. ⁴⁵Dodoo amuk beken tigtu etaw diyà sa tanà yu ataw ka sa egpegalebeken yu daa, endà mebaluy di kumaen siini pista. ⁴⁶Owoy amuk meuma sa egoh yu kumaen siini pista, diatas yu daa diyà sa dalesan kenà yu egtapay sa kaleni. Yoko eg-uwit duu diyà awang, apiya segepisang daa, owoy yoko ma egtepù duu sa tuelan di, apiya sebaen daa. ⁴⁷Langun yu etaw tegeIslaél sa kumaen siini pista. ⁴⁸Dodoo amuk duen sa etaw beken tegeIslaél mig-angay eg-ugpà diyà sa tanà yu owoy ungayà di mekelapeg ma diyà siini Pista Kinetalà Sa Kepigtamay i Nemula, mebaluy doo amuk pekelaingen yu muna sa ipat sa langun maama diyà sa dalesan di. Enù ka amuk nekelaingan da ipat, lagà da dé sa etaw tegeIslaél. Dodoo endà mebaluy di kumaen sa etaw amuk endà nekelaingan di ipat. ⁴⁹Mekelapeg sa langun etaw diyà siini uledin, iling ka sa etaw tegeIslaél ataw ka sa etaw beken tegeIslaél mig-angay daa eg-ugpà diyà sa tanà yu.”

⁵⁰Agulé pinangunutan sa langun tegeIslaél sa medoo igsugù i Datù Nemula igsugkow i Mosis owoy si Alon. ⁵¹Owoy iya ma dé sa agdaw egoh i Datù Nemula miglaun sa medoo tegeIslaél kedu diyà sa tanà Igiptu.

13 *13:1-16 Na, igtulù i Mosis si Datù Nemula sa épê sa langun maama lebi lawa, iling ka etaw ataw ka hinagtay. Amuk sa hinagtay melanih diyà sa kehaa i Nemula, imatayan da sa anay anak di enù ka ibegay da diyà si Nemula. Dodoo amuk sa hinagtay endà melanih di diyà sa kehaa i Nemula, sambian da sa nati kebibili anì imatayan da. Dodoo amuk etaw, mekesalig da polo diyà si Nemula anì meipat da sa langun uledin di.*

Igtulù i Mosis ma sa denu sa Pista egoh da egkaen sa epan endà duen ipelenuk di.

Duen Sa Gaeb Owoy Apuy Eghuna Diyà Sa Medoo TegeIslaél Eg-ipanaw

(Éksodo 13:17-22)

¹⁷⁻¹⁸Na, egoh i Datù Palo migpeipanaw sa medoo tegeIslaél, endà pineukit i Nemula duu kagda diyà sa kalasada diyà sa tanà tegePilistiya apiya di pa iya sa pantek ukitan da. Enù ka netiigan i Nemula amuk duen etaw gumila kenagda egoh da eg-ipanaw mehalì kéen sa pedu da owoy pelikù da dutu Igiptu dò, apiya di pa inuwit da ma sa hagda kinemkem. Huenan di, pineukit i Nemula polo kagda diyà sa melabel tanà mediyù dalesan eg-angay diyà sa dagat pinengadanan da Melalegà Dagat.

¹⁹Na, egoh da miglegkà kedu diyà Igiptu, inuwit i Mosis ma sa medoo tuelan sa tupù da si Hosé, enù ka pinepasad i Hosé sa medoo tegeIslaél egoh anay. Egoh i Hosé nehagtay pelà, igsasà di diyà sa medoo duma di tegeIslaél, guwaen di, “Netiigan ku tabangan i Nemula doo kiyu anì

mekelegkà yu dini owoy amuk meuma iya wé agdaw, uwit yu ma sa tuelan ku kedu dini.”^g

²⁰Na, egoh sa medoo tegeIslaél miglegkang diyà sa menuwa Sukot, mig-esud da diyà Itam diyà sa kilidan sa melabel tanà mediyù dalesan. ²¹Amuk agdaw, eghuna Datù Nemula i diyà kenagda migpeiling palas beletukoy enù ka egtulù kenagda sa ukitan da. Owoy amuk sigep, eghuna diyà kenagda sa éhê palas beletukoy eglegleg anì melegdawan da. Huenan di, mekeipanaw da doo agdaw owoy sigep. ²²Takà eghuna iya wé beletukoy diyà sa medoo tegeIslaél amuk agdaw, owoy duen ma iya wé éhê apuy amuk sigep.

Ini Sa Egoh Sa Medoo TegeIgiptu Miglohot Sa Medoo TegeIslaél

14 ¹Agulé mig-ikagi dema Datù Nemula i diyà si Mosis, ²guwaen di, “Tuloni ko sa medoo tegeIslaél anì pelikù da mangay denu sa menuwa Pihahilot sa teliwadaan sa menuwa Migdol owoy sa Melalegà Dagat. Esud yu dutu siedò kilidan dagat medapag diyà sa menuwa Baal-sipon. ³Iya sa baelan yu anì penemdemen i Palo endà mekegaga yu melaguy kedu diyà Igiptu enù ka mealang yu mukit diyà sa melabel tanà mediyù dalesan. ⁴Petegasen ku dema sa pedu di anì lohoten di kiyu. Amuk hediya, atuwan ku dé kagdi lapeg sa medoo sundalu di anì metiigan sa langun tegelgiptu aken si Datù Nemula owoy anì meolò a.” Hê, pinangunutan sa medoo tegeIslaél iya wé inikagi i Nemula igsugkow i Mosis.

⁵Na, egoh i Datù Palo tinulonon da migpelaguy dé sa medoo tegeIslaél, nesenulê sa penemdem di owoy sa penemdem sa medoo salu di ma. Guwaen da, “Endà mepion ini i binaelan ta. Maen di ya pinelegkà ta sa medoo tegeIslaél? Ngadan polo sa etaw udipenen ta atu?” ⁶Huenan di, igsugù i Palo sa kalitun di atung gamiten di amuk gumila owoy uwiten di ma sa medoo sundalu di. ⁷Inuwit di sa langun kalitun tegelgiptu atung gamiten da amuk eggila, lapeg sa enem gatus tigtu mepion. Diyà sa uman sebaen kalitun, duen sa duwa sundalu owoy sa pangulu da.^h ⁸Pinetegas i Datù Nemula dema sa pedu i Palo anì lohoten di sa medoo tegeIslaél miglegkà. Na, tigtu egkeanggan sa pedu sa medoo tegeIslaél egoh da eg-ipanaw. ⁹Na, sa medoo tegeIgiptu, sa medoo sundalu i Palo eg-edà kalitun anì gumila da owoy sa medoo egkudà ma, eglohoten da sa medoo tegeIslaél owoy neuma da kagda diyà sa kenà da eg-esud diyà sa kilidan dagat, medapag diyà sa menuwa Pihahilot diyà sa dibaluy sa menuwa Baal-sipon.

^g 13:19 Haa yu ma Génesis 50:25. ^h 14:7 Diyà sa kagi Hibelu, guwaen di, “Duen sa ketelu di etaw eg-edà diyà uman sebaen kalisa.” Na, diyà sa penemdem sa milantek etaw, siini ketelu di etaw sa ulu-ulu sa duwa duma di.

¹⁰Hê, tigtu nelimedangan sa medoo tegeIslaél egoh da mighaa sa medoo tegeIgiptu eglohot medapag dé diyà kenagda. Eg-umow da tabang diyà si Datù Nemula. ¹¹Owoy eggselsen da ma Mosis i, guwaen da, “Ngahàngahà ka. Enù di ya, endà duen sa kenà ta ilebeng dutu Igiptu dò, atu? Maen di ya inuwit ko kami diyà siini melabel tanà mediyù dalesan anì mematay ké dini? Taa ko. Amuk endà tinegel ko kami egpelegkà diyà Igiptu, endà mebaelan éhê ini i hedem diyà kenami. ¹²Netulengan ko pa sa inikagi ké diyà keniko dutu Igiptu dò anì endà tegelen ko duu kami pelegkà? Pemaen ko dé kami hedem egkeudipen diyà sa medoo tegeIgiptu, enù ka uman pa mepion sa egoh ké neudipen daa diyà sa egoh ké meimatayan diyà siini melabel tanà mediyù dalesan.”

¹³Migsagbì Mosis i diyà kenagda, guwaen di, “Yoko egkelimedangan na. Petanà yu polo sa pedu yu. Angati yu sa kealuk i Datù Nemula keniyu ini egoh di. Endà dé hauwen yu duu uman siedò medoo tegeIgiptu. ¹⁴Si Datù Nemula polo sa gumila diyà kenagda, beken kiyu. Endà duen sa niyu egbaelan.”

¹⁵Agulé mig-ikagi Datù Nemula i diyà si Mosis, guwaen di, “Maen di ya eg-umow yu tabang diyà kenak? Tuloni ko siini medoo etaw anì muman da mipanaw. ¹⁶Soyol ko sa tuked ko lekeatas sa kagpa't wayeg anì mesekawang sa dagat anì metikal sa ukitan yu matas mangay tanà dutu dò. ¹⁷⁻¹⁸Petegasen ku dema uman sa pedu sa medoo tegeIgiptu anì lohoten da kiyu. Amuk hediya, tabanan ku Palo i owoy sa langun sundalu di lapeg sa medoo kalitun eggamiten da amuk gumila da, anì metiigan sa langun tegeIgiptu aken si Datù Nemula owoy anì meolò a ma danà ku tumaban kenagda.”

¹⁹Na, sa eggsugùsuguen i Nemula takà eghuna diyà sa medoo tegeIslaél egoh da eg-ipanaw, mighalì mig-angay diyà sa iyugan da. Hediya ma mighalì ma siedò éhê beletukoy mig-angay diyà sa iyugan da. ²⁰Nebaluy iya sa alang diyà sa teliwadaan sa medoo tegeIgiptu owoy sa medoo tegeIslaél. Neelut sigep, takà eglegdaw iya wé éhê apuy diyà sa kenà sa medoo tegeIslaél, dodoo tigtu egdeleman diyà sa kenà sa medoo tegeIgiptu. Huenan di, endà egkesedapag sa medoo tegeIgiptu owoy sa medoo tegeIslaél.

²¹Agulé sinoyol i Mosis sa tuked di lekeatas sa kagpa't wayeg. Hê, neelut sigep pineleges i Datù Nemula sa kelamag kedu diyà sa tebowon agdaw. Huenan di, nesekawang sa wayeg anì dumuen sa netikal ukitan da diyà sa teliwadà di. ²²Agulé egbatas sa langun tegeIslaél mangay tanà dutu dò. Netikal sa kenà da eg-ukit diyà sa teliwadà dagat, owoy nekeiling delama sa wayeg dagat denu kuwanan da owoy denu bibang da ma.

²³Hê, eglohot ma sa medoo tegeIgiptu eg-ukit diyà siedò netikal nesekawangan dagat, lapeg sa langun etaw i Palo egkudà owoy sa medoo

sundalu di eg-edà kalitun. ²⁴Dodoo si Datù Nemula diyà sa beletukoy éhê legleg apuy, eghauwen di doo sa medoo eglohot egoh di buyu sumimag. Huenan di, tigtu egbogowen di sa medoo sundalu tegeIgiptu. ²⁵Nekelebeng sa lisen sa medoo kalitun da owoy nekedan ma sa duma lisen di, huenan di egkelikutan da dé eglohot. Guwaen da, “Pelikù ki polo. Pedyù ki diyà sa medoo tegeIslaél, enù ka iya polo sa egkebalà ta si Datù Nemula sa egtabang kenagda.”

²⁶Agulé mig-ikagi Datù Nemula i diyà si Mosis, guwaen di, “Soyol ko dema sa tuked ko diyà sa kagpa't dagat anì mesedelagkup sa wayeg anì melened sa medoo tegeIgiptu, lapeg sa medoo kalitun da ma.” ²⁷Agulé sinoyol i Mosis sa tuked di. Hê, egoh di umenaw simag, nesedelagkup dé sa dagat. Egpelaguy doo hedem sa medoo tegeIgiptu, dodoo sinedelagkup i Datù Nemula sa wayeg nesekawang, huenan di nelened da dé langun. ²⁸Na, egoh sa wayeg nesedelagkup, nelimunan wayeg sa langun sundalu i Palo miglohot sa medoo tegeIslaél diyà sa dagat, lapeg sa medoo kalitun gamiten da amuk gumila da. Nelened da langun, endà duen sebaen nesamà.

²⁹Dodoo sa medoo tegeIslaél, dutu da dé tanà dutu dò enù ka mig-ukit da diyà sa netikal tanà diyà sa teliwadà nesekawangan dagat, owoy nekeiling delama sa wayeg denu bibang da owoy denu kuwanan da ma. ³⁰Iya dé sa agdaw kealuk i Datù Nemula sa medoo tegeIslaél kedu diyà sa egkegaga sa medoo tegeIgiptu, owoy hinaa sa medoo tegeIslaél sa medoo tegeIgiptu nematay dé diyà sa kilidan dagat. ³¹Na, danà sa medoo tegeIslaél mighaa sa daker egkegaga i Datù Nemula egoh di migtaban diyà sa medoo tegeIgiptu, huenan di eg-adatan da dé kagdi i. Owoy egpigtuuwen da ma kagdi i owoy sa sinaligan di, si Mosis.

Ini Sa Duyuy I Mosis

(Éksodo 15:1-2)

15 ¹Agulé, migduyuy Mosis i owoy sa medoo duma di tegeIslaél enù ka eg-oloen da Datù Nemula i. Éhê ini sa duyuy da, guwaen da,

“Tigtu egduyuyen ku Datù Nemula i, enù ka eglowon sa egkegaga di egtaban diyà sa kuntelà di.

Igbuung di dé diyà dagat sa medoo kudà owoy sa medoo sundalu ma.

²Épê daker egkegaga Datù Nemula i sa egduyuyen ku.

Enù ka kagdi sa mig-aluk kenak kedu diyà sa medoo kuntelà ku.

Kagdi sa Nemula egpigtuuwen ku, owoy tigtu oloen ku kagdi ya.

Kagdi ma sa Nemula egpigtuuwen sa medoo tupù ku, owoy doyonen ku sa daker egkegaga di.”

Ini Sa Egoh Da Migselsel Si Mosis Enù Ka Mepait Sa Wayeg

(Éksodo 15:22-27)

²²Agulé, inuwit i Mosis sa medoo tegeIslaél kedu diyà sa Melalegà Dagat owoy mig-angay da diyà sa melabel tanà mediyù dalesan pinengadanan da Tanà Sul. Telu agdaw sa lugay da eg-ipanaw, dodoo endà duen wayeg hinaa da. ²³Agulé migtebow da diyà sa tebulan Malah. Mepait sa selepangan iya wé ngadan Malah, enù ka tigtu mepait iya wé wayeg, huenan di endà egkeinem da duu. ²⁴Egselselen sa medoo tegeIslaél dema Mosis i, guwaen da, “Enù di ya, ngadan sa meinem ta ini egoh di?”

²⁵Agulé migsimbà Mosis i egpegeni tabang diyà si Datù Nemula. Hê, igpehaa i Datù Nemula diyà kenagdi sa panga kayu. Egoh di migkuwa, igdugsù di diyà sa wayeg. Hê, nekedan dé sa kepait di.

Na, egoh da dahiya pelà, binegayan i Datù Nemula kagda sa uledin, owoy egtepegangan di ma kagda. ²⁶Guwaen di, “Amuk pedakelan pedu yu sa kepangunut yu kenak anì ilingan yu sa metiengaw adat kenà ku metuuan, owoy amuk pangunutan yu ma sa langun uledin ku owoy sa uyot ku ma, endà peukiten ku duu diyà keniyu sa medoo linadu pineangay ku diyà sa medoo tegelgiptu. Enù ka aken si Datù Nemula sa mulung keniyu.”

²⁷Agulé egoh da miglegkà dahiya, mig-angay da diyà sa sugud Ilim kenà sa sepulù owoy duwa tebulan owoy sa pitu pulù gepesu lepò. Mig-esud da dahiya diyà sa kilidan wayeg.

Ini Sa Egoh I Nemula Migbegay Kaenen Diyà Sa Medoo TegeIslaél

16 ¹Agulé miglegkà sa langun tegeIslaél diyà Ilim owoy eg-ipanaw da dema. Na, egoh di neuma sa kesepulù di owoy lima agdaw diyà sa keduwa bulan edung sa egoh da miglegkà diyà Igipitu, migtebow da diyà sa melabel tanà mediyù dalesan pinengadanan da Sin, sa neseteliwadaan Ilim owoy Getan Sinay. ²Egoh da dé dutu siedò melabel tanà mediyù dalesan, eglselselen da dema Mosis i owoy si Alon. ³Guwaen da, “Mepion pa hedem amuk inimatayan i Datù Nemula dé kami dutu Igipitu dò. Enù ka egoh ké pelà dutu, nekekaen ké pa sa medoo kaleni owoy sa medoo balangan kaenen taman sa egkeiyapan ké egkaen. Dodoo diyà siini melabel tanà mediyù dalesan sa kenà yu mig-uwit kenami, mematay ki langun danà bitil.”

⁴Agulé mig-ikagi Datù Nemula i diyà si Mosis, guwaen di, “Na, tuntunen ku sa kaenen diyà keniyu kedu langit dò. Uman magtu kesimag, pelaun ko sa langun etaw diyà sa kemalig da anì kuwaen da sa kaenen da nekeenget taman segeagdaw. Enù ka egtepegangan ku daa kagda amuk

tigtu tuu sa kepangunut da diyà sa igsugù ku. ⁵Amuk meuma sa keenem di agdaw, siglapegen da sa kekuwa da anì mekeenget kaenen da taman duwa agdaw, owoy tapayen da ma umilegà sa kinuwa da.”

⁶Huenan di, mig-ikagi Mosis i owoy si Alon diyà sa langun tegeIslaél, guwaen da, “Amuk buyu sumalep sa agdaw kani, metiigan yu doo si Datù Nemula sa mig-uwit keniyu kedu Igiptu dò. ⁷Owoy amuk sumimag, hauwen yu ma sa senang di, enù ka dinineg di doo sa keselsel yu kenagdi. Iya sa guwaen ké enù ka kagdi polo sa eggselselen yu, beken kami daa, enù ka egbaelan ké daa sa uyot di.” ⁸Agulé guwaen i Mosis dema, “Si Datù Nemula sa megay diyà keniyu sa kaleni kaenen yu kani mahapun owoy sa kaenen yu amuk magtu kesimag taman sa egkeiyapan yu egkaen. Enù ka dinineg di doo sa keselsel yu kenagdi. Beken duu kami sa eggselselen yu, dodoo si Datù Nemula polo.”

⁹Agulé guwaen i Mosis diyà si Alon, “Ikagi ko diyà sa langun tegeIslaél anì mangay da diyà sa taengan i Datù Nemula, enù ka dinineg di sa keselsel da.”

¹⁰Na, egoh i Alon eg-ikagi pelà diyà sa medoo tegeIslaél, mig-isalu da langun denu sa melabel tanà mediyù dalesan. Hê, petow dé hinaa da sa senang i Datù Nemula diyà siedò beletukoy. ¹¹Agulé mig-ikagi Datù Nemula i diyà si Mosis, guwaen di, ¹²“Dinineg ku doo sa keselsel sa medoo tegeIslaél. Na, tuloni ko kagda begayan ku kagda kaleni amuk buyu sumalep sa agdaw owoy sa kaenen da ma amuk umenaw simag taman sa egkeiyapan da egkaen, anì metiigan da aken si Datù Nemula sa epgigtuuwen da.”

¹³Na, egoh di sumalep sa agdaw, migtenà sa segelugba pugù. Medoo da temù migtenà diyà sa kenà sa medoo tegeIslaél mig-esud. Owoy egoh di umenaw simag, duen sa medoo aglù nekeulingut diyà sa medoo kemalig da. ¹⁴Egoh di netikal iya wé aglù, duen sa hinaa da diyà tanà sa éhê palas betê palay menipis owoy mebulà ma. ¹⁵Egoh sa medoo tegeIslaél mighaa iya wé, endà netiigan da duu, huenan di, egseigsaay da, guwaen da, “Ngadan ini i?”

Mig-ikagi Mosis i diyà kenagda, guwaen di, “Ini sa kaenen igbegay i Datù Nemula diyà kenita. ¹⁶Owoy ini sa uledin i Datù Nemula denu ini i. Kumuwa daa sa uman sebaen etaw sa nekeenget kaenen di diyà sa segeagdaw. Enem katasa daa sa enget kaenen sa uman sebaen etaw diyà sa kemalig di.”

¹⁷Hê, pinangunutan sa medoo tegeIslaél sa tinulon i Mosis. Duen etaw migkuwa medoo owoy duen ma migkuwa diisek daa. ¹⁸Dodoo egoh da migtasa sa kinuwa da, amuk duen sa migkuwa medoo, endà ma subela di. Owoy sa etaw migkuwa diisek daa, endà ma kulang di. Tigtu nekeenget diyà kenagda sa nekuwa da.

¹⁹Agulé mig-ikagi dema Mosis i diyà kenagda, guwaen di, “Yoko eggsamà duu taman sumimag.” ²⁰Dodoo duen etaw diyà kenagda endà

egpigtuu da diyà sa inikagi i Mosis, enù ka sinamà da doo sa duma kaenen da. Dodoo egoh di umenaw simag, migsapat dé sa sinamà da owoy newali ma dé. Huenan di, binulitan i Mosis kagda.

²¹ Uman magtu kesimag egkuwaen sa medoo etaw sa taman egkeiyapan da egkaen. Agulé amuk meedup dé sa agdaw, metunag dé sa nesamà diyà tanà. ²² Egoh di neuma sa keenem di agdaw, siniglapag da sa kekuwa da. Sepulù owoy duwa katasa sa kinuwa sa uman sebaen etaw. Agulé mig-angay sa medoo ulu-ulu tegeIslaél diyà si Mosis owoy egtulonen da iya wé diyà kenagdi. ²³ Hê, sinelepang i Mosis diyà kenagda, guwaen di, “Ini sa uledin igsugù i Datù Nemula. Etud yu langun simag enù ka iya sa Agdaw Keetud, sa mapulù agdaw diyà sa kehaa i Nemula. Huenan di, ilegà yu dé ini egoh di sumalà dé sa egkeiyapan yu egkaen, iling ka bugbugen yu ataw ka dangayen yu. Amuk duen sa nesamà yu, tagui yu anì iya sa kaenen yu simag.”

²⁴ Agulé pinangunutan da sa inikagi i Mosis, owoy sinamà da sa kaenen da simag. Endà newali sa kaenen sinamà da owoy endà ma migsapat di. ²⁵ Mig-ikagi dema Mosis i diyà kenagda, guwaen di, “Kaen yu dé iya wé ini egoh di, enù ka ini sa Agdaw Keetud, sa mapulù agdaw diyà sa kehaa i Datù Nemula. Endà duen sa kaenen mehaa yu diyà tanà ini egoh di. ²⁶ Taman enem agdaw daa sa keangay yu kumuwa kaenen uman magtu kesimag. Dodoo amuk meuma sa kepitu di agdaw, sa Agdaw Keetud, endà duen sa kaenen hauwen yu diyà tanà.”

²⁷ Dodoo duen etaw diyà kenagda endà egpangunut da diyà sa inikagi i Mosis. Apiya di pa sa kepitu di agdaw, eg-angay da doo egkuwa kaenen, dodoo endà duen sa eghauwen da. ²⁸ Agulé mig-ikagi Datù Nemula i diyà si Mosis, guwaen di, “Ngadan taman sa endà kepangunut yu diyà sa medoo igsugù ku? ²⁹ Petulengtuleng yu aken si Datù Nemula sa migbegay diyà keniyu sa Agdaw Keetud. Huenan di, amuk meuma sa keenem di agdaw, begayan ku kiyu sa mekeenget kaenen yu taman duwa agdaw. Owoy amuk meuma sa kepitu di agdaw, ugpà yu daa diyà sa kemalig yu. Yoko eglaun na.” ³⁰ Na, edung egoh iya, eg-etud dé sa medoo tegeIslaél amuk sa kepitu di agdaw.

³¹ Na, manaⁱ sa kepengadan sa medoo tegeIslaél iya wé kaenen kinuwa da. Lagà sa diisek betê palay gineléh, mebulà owoy meemis ma sa nanam di lagà sa biskuwit inamutan teneb. ³² Agulé mig-ikagi Mosis i diyà kenagda, guwaen di, “Ini ma sa igsugù i Datù Nemula. Kuwa yu sa enem katasa sa kaenen mana owoy pepion yu sa ketagù yu anì hauwen sa medoo tugod yu siini kaenen igbegay di diyà keniyu egoh yu diyà sa melabel tanà mediyù dalesan egoh di mig-uwit keniyu kedu Igipu dò.”

³³ Agulé guwaen i Mosis diyà si Alon, “Kuwa ko sa buyung owoy dalem ko sa enem katasa siini kaenen mana. Tenai ko ma diyà sa taengan i

ⁱ 16:31 Iya sa selepangan siini kagi mana, “Ngadan ini i?”

Datù Nemula dutu siedò kenà ta egsembà, anì hauwen sa medoo tugod ta mekesetugdug kenita sa kaenen mana.”

³⁴Agulé, pinangunutan i Alon sa igsugù i Datù Nemula diyà si Mosis. Igtenà di sa tinaguan di mana diyà sa taengan sa Baul Tandà Sa Igpasad i Nemula, anì melalù sa keipat da. ³⁵Na, mana sa egkaenen sa medoo tegeIslaél taman epat pulù gepalay, owoy taman sa egoh da nekeuma diyà sa tanà Kanan sa kenà da mig-ugpà.

Ini Sa Egoh Di Duen Wayeg Eglesut Diyà Sa Batu

17 ¹Agulé miglegkà dema sa medoo tegeIslaél diyà siedò melabel tanà Sin mediyù dalesan, enù ka egsehalihali da diyà sa egpeangayan i Datù Nemula kenagda. Hê, mig-esud da diyà sa tanà Lépidim, dodoo endà duen wayeg dahiya. ²Huenan di, egselfelen da dema Mosis i, guwaen da, “Begayi ko kami sa inemen ké.”

Migsagbi Mosis i, guwaen di, “Maen di ya egselfelen yu aken? Enù di ya, egtepengan yu Datù Nemula i?”

³Dodoo tigtu eglupahan sa medoo tegeIslaél, huenan di egtemuen da egselfel Mosis i. Guwaen da, “Maen di ya inuwit ko kami kedu Igipito dò, anì mematay ké langun danà ké endà egpekinem, lapeg sa medoo anak ké owoy sa medoo hinagtagy ké ma?”

⁴Huenan di, migsimbà Mosis i egpegeni tabang diyà si Datù Nemula, guwaen di, “Ngadan sa egkebaelan ku igoh diyà siini medoo etaw? Buyuwen da dé aken egbuung batu anì mematay a.”

⁵Migsagbi Datù Nemula i, guwaen di, “Peunut ko keniko sa duma ulu-ulu tegeIslaél, owoy huna yu diyà sa langun etaw. Uwit ko ma sa tuked ko sa igtapes ko diyà sa wayeg Nilo. Na, ipanaw yu dé. ⁶Angatan ku kiyu dutu siedò dakel batu diyà sa Getan Sinay. Amuk tumbow yu, tapes ko tuked sa batu anì lumesut sa wayeg anì inemen sa langun etaw.” Agulé binaelan i Mosis iya wé diyà sa taengan sa medoo ulu-ulu tegeIslaél. ⁷Na, Masa owoy Méliba sa kepengadan da iya wé kenà da, enù ka egselfelen sa medoo tegeIslaél Mosis i dahiya owoy egtepengan da ma Datù Nemula i. Guwaen da, “Enù di ya, eg-ipaten i Datù Nemula pa kita ataw ka endà?”

Ini Sa Egoh Da Egsegilaway Sa Medoo TegeIslaél Owoy Sa Medoo TegeAmalék

⁸Na, egoh sa medoo tegeIslaél pelà diyà sa tanà Lépidim, pinangayaw sa medoo tegeAmalék kagda. ⁹Agulé mig-ikagi Mosis i diyà sa salu di, si Hosuwa. Guwaen di, “Hemili ko diyà sa medoo duma ta maama sa enggaten ko mangay gumila diyà sa medoo tegeAmalék. Owoy aken, simag mangay a tumigdeg diyà sa kogol getan anì sugpayalen ku kiyu owoy sabaan ku ma sa tuked igpeuwit i Nemula takà diyà kenak.”

¹⁰Agulé pinangunutan i Hosuwa sa igsugù i Mosis, owoy mig-angay eggila diyà sa medoo tegeAmalék. Mig-angay Mosis i owoy si Alon owoy

si Hul diyà sa kogol getan. ¹¹Na, amuk egpetigdegen i Mosis sa belad di, tumaban sa medoo tegeIslaél, dodoo amuk lugkenen di sa belad di, tumaban polo sa medoo tegeAmalék. ¹²Dodoo danà di egkelugay sa kesegilaway da, egkegis sa belad i Mosis. Huenan di, migkuwa batu Alon i owoy si Hul, agulé pineugsad da Mosis i dahiya. Owoy migtigdeg da ma egsabà sa belad di, sebaen denu kuwanan owoy sebaen denu bibang di, anì endà melugken di duu taman umeled sa agdaw. ¹³Huenan di, tigtu negelà sa medoo tegeAmalék danà da i Hosuwa.

¹⁴Agulé mig-ikagi Datù Nemula i diyà si Mosis, guwaen di, “Sulati ko ini i anì endà melipengan yu duu sa egoh yu migtaban sa medoo tegeAmalék. Owoy tuloni ko ma Hosuwa i kedanan ku sa medoo tegeAmalék diyà siini sinukub langit.”

¹⁵Na, binaelan i Mosis dahiya sa atung kenà da eg-ulow sa ibegay da diyà si Nemula. Pinengadanan di iya wé “Si Datù Nemula sa lagà bandila ku enù ka kagdi sa Pangulu ku.” ¹⁶Owoy guwaen i Mosis diyà sa medoo duma di, “Pinetigdegan ku belad ku Datù Nemula i, huenan di kagdi dé sa umatu diyà sa medoo tegeAmalék taman melugay.”

18 *18:1-12 Na, dinineg i Hételo sa langun binaelan i Nemula diyà sa awas di si Mosis owoy denu sa kepelegkà i Nemula sa medoo tegesIslaél kedu Igiptu dò. Agulé mig-angay eglengen diyà si Mosis owoy pinelikù di ma Sipola i sawa i Mosis owoy sa duwa bébê di anak da i Mosis. Enù ka egoh da i Mosis diyà sa melabel tanà mediyù dalesan, mig-angay da Sipola i eglengen diyà si Hételo emà di. Agulé neanggan Mosis i egoh di mighaa sa nugangan di si Hételo sa atung tegesimbà dutu tanà Midiyan dò.*

Ini Sa Egoh Da Miggelal Sa Medoo Kaunutan

(Éksodo 18:13-27)

¹³Na, egoh di umenaw simag, migpenuu dema Mosis i anì antangen di sa medoo tegesIslaél egsesigbolowoy. Iya sa egbaelan di edung magtu kesimag taman sumigep enù ka medoo sa etaw egpeantang. ¹⁴Agulé egoh i Hételo nugangan di mighaa sa kedoo egbaelan i Mosis, guwaen di diyà kenagdi, “Ngadan ini i egbaelan ko diyà siini medoo etaw? Maen di ya kuna daa sa tegeantang dahini diyà siini medoo etaw eg-angat-angat egpeantang edung magtu kesimag taman sumigep?”

¹⁵Migsagbì Mosis i, guwaen di, “Iya sa egkebaelan ku enù ka eg-angay da petabang diyà kenak anì metiigan da sa uyot i Nemula.

¹⁶Amuk egsesigbolowoy sa etaw, mangay da peantang diyà kenak. Agulé egtulonen ku diyà kenagda sa tayu di sa épê ketuu owoy egselepangen ku ma diyà kenagda sa medoo uledin i Nemula.”

¹⁷Agulé mig-ikagi Hételo i, guwaen di, “Endà mepion di iya wé egbaelan ko, ¹⁸enù ka egkeliteg ka owoy egkepuleg ma siini medoo

etaw egpeantang. Nekomowon siini galebek ko diyà sa egkegaga ko amuk kuna daa sa tegeantang. ¹⁹Na, dinegdineg ko siini eg-ikagiye ku mepion hedem amuk pangunutan ko, enù ka netiigan ku metabangan i Nemula kuna. Na, mepion doo amuk kuna sa umantang sa medoo etaw diyà si Nemula, enù ka kuna sa meketulon diyà kenagdi sa medoo egsesigbolowen da. ²⁰Owoy kuna ma sa tumulù kenagda sa langun igsugù i Nemula owoy sa adat da kenà di metuowan, enù ka egselepangen ko diyà kenagda sa mepion baelan da. ²¹Dodoo ini ma sa baeli ko, hemilì ko sa medoo etaw diyà sa langun tegeIslaél anì tabangan da kuna. Iya sa etaw hemilì ko sa mepion adat owoy sa mekegaga umantang owoy sa tigtu miadat diyà si Nemula owoy sa egkesaligan ma. Endà mebaluy di amuk dakel sa pedu di diyà sa pantiyali. Amuk gelalen ko dé kagda kaunutan, duen sa umipat sengibu etaw, duen umipat magatus, owoy duen ma lima pulù, owoy duen ma sepulù. ²²Mebaluy dé kagda sa umantang diyà sa medoo etaw taman melugay. Na, amuk duen sa melikut eg-antangen, mepion amuk uwiten da doo diyà keniko. Dodoo sa medoo melemu, megaga da doo umantang. Agulé kumelemu sa galebek ko enù ka egtabangan da kuna eg-antang. ²³Amuk baelan ko ini i owoy amuk metuowan ma Nemula i, endà tigtu ka mepasangan. Owoy lumikù ma siini medoo etaw amuk ubus da dé inantang.”

²⁴Na, egoh i Mosis migdineg sa inikagi sa nugangan di, pinangunutan di sa langun igtulù di. ²⁵Hinemilì di sa medoo maama tegeIslaél mepion adat owoy sa mekegaga umantang. Agulé ginelal di kaunutan. Duen sa umipat sengibu etaw, duen magatus, owoy duen ma lima pulù owoy duen ma sepulù. ²⁶Kagda dé sa tegeantang diyà sa medoo etaw. Amuk melikut sa egsesigbolowen etaw, eg-uwiten da dema diyà si Mosis, dodoo amuk melemu daa sa egsesigbolowen da, kagda dé sa umantang.

²⁷Agulé mig-ebal Hételo i diyà si Mosis enù ka lumikù diyà sa hagdi tanà.

Ini Sa Egoh I Datù Nemula Mig-ikagi Diyà Sa Medoo TegeIslaél Diyà Sa Getan Sinay

(*Éksodo 19:1-19*)

19 ¹⁻²Na, miglegkà dema sa medoo tegeIslaél diyà Lépidim, owoy mig-angay da diyà sa melabel tanà mediyù dalesan diyà Sinay. Egoh da migtebow dahiya, iya sa muna agdaw diyà sa ketelu di gebulan edung sa egoh da miglegkà diyà Igiptu. Agulé eg-esud da diyà sa esudan sa Getan Sinay.

³Agulé migtekedeg Mosis i diyà sa getan anì mikagi diyà si Nemula. Hê, mig-umow Datù Nemula i kedu diyà sa tuduk Sinay, guwaen di, “Ini sa ikagi ko diyà sa medoo tegeIslaél, sa medoo tugod i Hakob. ⁴Guwaen

ko diyà kenagda, ‘Ini sa kagi i Datù Nemula, guwaen di hinaa yu doo sa binaelan ku diyà sa medoo tegeIgiptu, owoy inuwit ku ma kiyu dahini. Eg-ipaten ku kiyu lagà sa banug eg-uwit sa pispis di diyà sa pakpak di. ⁵Na, amuk tigtu yu mangunut diyà kenak owoy amuk endà melipengan yu duu sa pasad ku diyà keniyu, mebaluy doo kiyu sa mapulù etaw hinemilì ku. Apiya di pa naken sa langun balangan etaw diyà tanà, hinemilì ku doo kiyu ⁶anì kiyu lagà sa medoo atung tegesimbà enù ka takà yu egpangunut diyà kenak. Owoy mebaluy ma kiyu sa metiengaw etaw egsabaan ku.’ Na, iya sa ikagi ko diyà sa medoo tegeIslaél.”

⁷Huenan di, miglungel dema Mosis i, owoy egsetiponen di sa medoo ulu-ulu tegeIslaél. Egoh da nesetipon, tinulon di diyà kenagda sa langun igpeikagi i Datù Nemula diyà kenagdi. ⁸Agulé egoh da migdineg iya wé, neseselengan da migsagbi, guwaen da, “Pangunutan ké doo sa langun igsugù i Datù Nemula.” Agulé migpelikù dema Mosis i diyà si Nemula anì tulonen di sa inikagi sa medoo etaw.

⁹Agulé guwaen i Datù Nemula diyà si Mosis, “Peunut a diyà sa mekepal gaeb amuk mangay a mikagi diyà keniko anì medineg sa medoo etaw sa egoh ku sumetawit keniko, anì kumeeles sa kesalig da diyà keniko taman melugay.”

Agulé tinulon i Mosis diyà si Datù Nemula sa inikagi sa medoo etaw.

¹⁰Mig-ikagi dema Datù Nemula i diyà si Mosis, guwaen di, “Pelikù ka dé. Tuloni ko sa medoo etaw anì tapayen da dé kagda pelanìh ini egoh di owoy simag ma owoy anì pìpian da ma sa ginis da enù ka sumimbà da diyà kenak. ¹¹Agulé amuk meuma sa ketelu di agdaw, meketapay da dé, enù ka iya sa egoh ku tumenà diyà siini Getan Sinay anì hauwen sa medoo etaw aken i Datù Nemula. ¹²Huenan di, baeli ko sa elet ipeulingut diyà siini getan owoy hawidi ko kagda anì endà tipayen da duu owoy anì endà tumekedeg da owoy endà ma utuhan da duu, enù ka meimatayan doo sumalà dé sa etaw tumipay. ¹³Amuk duen sa tumipay, panà yu daa ataw ka buungen yu daa batu anì mematay, enù ka melihi amuk egsabaan yu. Amuk duen sa tumipay, iling ka etaw ataw ka hinagtay, meimatayan da doo. Na, amuk dinegen yu sa dagì tegbuli, angay yu setiponoy langun diyà sa esudan siini getan.”

¹⁴⁻¹⁵Agulé miglungel dema Mosis i kedu diyà sa getan, owoy egtulonon di sa medoo etaw, guwaen di, “Amuk meuma sa ketelu di agdaw, tumenà Datù Nemula i. Huenan di, tapayen ta pelanìh sa lawa ta owoy pìpian ta ma sa ginis ta enù ka sumimbà ki diyà kenagdi. Owoy endà ma mebaluy di amuk meseuma da lawa sa etaw telesawa sa linuwan ta eg-angat-angat si Nemula.”

¹⁶Na, egoh di neuma sa magtu kesimag ketelu di agdaw, egsilà owoy egpeletê diyà siedò getan, owoy duen ma sa mekepal gaeb diyà sa pulu tuduk, owoy duen ma sa dagì tegbuli tigtu metaled dinineg da.

Huenan di, eglukub sa langun etaw danà da nelimedangan. ¹⁷Agulé inuwit i Mosis sa langun etaw eg-angay diyà sa esudan siedò getan anì telabuken da Nemula i. ¹⁸Éhê egoh eg-ebel sa Getan Sinay, enù ka migtenà Datù Nemula i nekeiling palas apuy. Migtiboloy sa ebel lagà sa ebel sa dakel apuy, huenan di tigtu eglukub ma sa medoo etaw danà da egkelimedangan.^j ¹⁹Owoy egkeumanan ma sa ketaled sa dagì tegbuli. Mig-ikagi Mosis i, agulé sinagbian i Nemula sa éhê kagi kilat.

19:20-25 Mig-ikagi dema Datù Nemula i diyà si Mosis anì hawidan di sa medoo etaw anì endà tipayen da duu siedò elet nekeulingut diyà sa getan kenà i Nemula migtenà.

Ini Sa EgoH I Nemula Migbegay Sa Sepulù Uledin Diyà Si Mosis

(Éksodo 20:1-18)

20 ¹Na, mig-ikagi Nemula i owoy ini sa kagi di, ²guwaen di, “Aken si Datù Nemula sa egpigtuuwen yu, owoy aken sa mig-uwit keniyu kedu Igiptu dò kenà yu neudipen.

³“Huenan di, yoko egpenemula duu sa liyu, aken daa sa penemula yu.

⁴“Yoko egbael duu sa inetaw penemulawen yu sa éhê palas sa eghauwen yu dutu langit dò ataw ka dahini diyà tanà ataw ka sa medoo diyà wayeg. ⁵Yoko egligkued da diyà sa taengan da owoy yoko ma egsimbà ya diyà kenagda, enù ka aken si Datù Nemula sa egpigtuuwen yu. Tigtu a endà meiyap amuk duen sa liyu egpenemulawen yu. Huenan di, tigtu pigtamayan ku sa etaw eg-iniyug diyà kenak, lapeg sa anak da taman sa bébê siku da. ⁶Dodoo sa medoo etaw eghidu kenak owoy egpangunut ma diyà sa langun uledin ku, ipehaa ku doo diyà kenagda owoy diyà sa medoo tugod da sa dakel kehidu ku kenagda taman melugay.

⁷“Yoko eg-usal duu sa ngadan ku diyà sa medoo medaet ungayà yu, enù ka tigtu pigtamayan ku doo sa etaw eg-ikagi daa uloy sa ngadan ku, aken i Datù Nemula sa egpigtuuwen yu.

⁸“Yoko egkelipeng duu eg-adatan sa Agdaw Keetud, enù ka iya sa baed ku. ⁹Mebaelan yu doo sa galebek yu taman enem agdaw. ¹⁰Dodoo sa kepitu di agdaw, iya sa Agdaw Keetud sa ibegay yu diyà kenak baed ku, aken i Datù Nemula. Amuk meuma dé sa kepitu di agdaw, yoko eglampang duu danà yu eggalebek, hediya ma sa anak yu owoy sa egsguen yu owoy sa hinagtay yu owoy sa etaw beken tigtu duma yu ma eg-ugpà diyà sa menuwa yu. ¹¹Enù ka aken si Datù Nemula sa migpeduen sa langit owoy tanà owoy dagat lapeg sa langun eghauwen dalem taman enem agdaw daa. Agulé mig-etud a diyà sa kepitu di agdaw enù ka

^j 19:18 Diyà sa medoo liyu igsulat, guwaen di iya sa egkekeyung sa tanà sa Getan Sinay.

neubus dé sa langun. Huenan di, pinilagà ku siini agdaw enù ka tigtu mapulù diyà sa kehaa ku.

¹² “Adati yu sa emà yu owoy sa inay yu, anì melalù yu mugpà diyà sa tanà ibegay ku diyà keniyu.

¹³ “Yoko eg-imatay ya etaw.

¹⁴ “Yoko egbigà ya.

¹⁵ “Yoko egpenakaw wa.

¹⁶ “Yoko egbutbut ta egtipu sa duma yu.

¹⁷ “Yoko egkesina ya, owoy yoko egkeilayam duu sa langun taman sa duma yu, upama sa dalesan di ataw ka sa sawa di ataw ka sa udipen di ataw ka sa hinagtagy di ataw ka sumalà dé sa hagdi langun taman.”

Ini Sa EgoH Da Tigtu Nelimedangan Sa Medoo TegeIslaél

(Éksodo 20:18-21)

¹⁸ Na, egoH sa medoo tegeIslaél migdineg sa kilat owoy sa dagì tegbuli, owoy egoH da mighaa sa silà owoy sa mekepal ebel diyà sa getan, tigtu nelimedangan da, huenan di eglukub da owoy egpediyùdiyù da egtigdeg.

¹⁹ Agulé migpegeni da diyà si Mosis, guwaen da, “Amuk kuna dé sa mikagi diyà kenami, pangunutan ké doo, dodoo yaka dé egpeikagi duu Nemula i diyà kenami anì endà mematay ké.”

²⁰ Agulé mig-ikagi Mosis i diyà kenagda, guwaen di, “Yoko egkelimedangan na. Egtepengan i Nemula daa kiyu anì tigtu adatan yu owoy anì endà mekebael yu salà diyà kenagdi.”

²¹ Hê, mig-angay Mosis i egpedapag diyà sa mekepal gaeb sa kenà i Nemula migpeunut. Dodoo sa medoo etaw, tapay da doo egpediyùdiyù eg-ugpà diyà sa esudan getan.

20:22–23:33 Na, igbegay i Nemula sa medoo uledin di diyà si Mosis anì pangunutan sa medoo tegeIslaél. Duen uledin denu sa mepion keugpà da owoy duen ma sa denu adat kesimbà da diyà si Datù Nemula. Owoy igpasad i Nemula ma sa ketabang di kenagda anì mekeuma da diyà sa tanà ibegay di diyà kenagda.

Ini Sa EgoH Sa Medoo Etaw Netuuwan Diyà Sa Pasad I Nemula Diyà Kenagda

(Éksodo 24:1-11)

24 ¹ Agulé mig-ikagi Datù Nemula i diyà si Mosis, guwaen di, “Tekedeg ka dema angay diyà sa kenà ku. Uwit ko ma Alon i owoy sa duwa anak di, si Nadab owoy si Abihu, owoy sa pitu pulù kaunutan sa medoo tegeIslaél. Owoy amuk mediyùdiyù yu pelawà, simbà yu diyà kenak. ² Kuna daa sa mekeangay dumapag diyà kenak, beken sa

medoo duma ko. Endà ma mebaluy di peunut da tumekedeg sa medoo tegeIslaél.”

³Agulé migpelikù Mosis i owoy egtulonen di diyà sa medoo tegeIslaél sa langun uledin igsugù i Datù Nemula. Neseselengan da egsagbi, guwaen da, “Mangunut ké doo diyà sa langun igsugù i Datù Nemula.” ⁴Agulé igsulat i Mosis sa langun igsugù i Datù Nemula.

Na, egoh di umenaw simag, miglapus Mosis i mig-angay diyà sa esudan sa getan owoy binaelan di sa atung kenà da eg-ulow sa ibegay da diyà si Nemula. Pinetigdeg di ma sa sepulù owoy duwa batu anì tandaan di sa sepulù owoy duwa geumpung tugod i Islaél. ⁵Agulé sinugù di sa medoo batàbatà maama anì mangay da umulow sa medoo hinagtay inimatayan da ibegay da diyà si Datù Nemula. Sinumbalì da ma sa medoo tudu sapi sa ibegay da diyà si Nemula, agulé kinaen sa medoo etaw anì tandaan da sa kesepasaday da si Nemula. ⁶Agulé binaed i Mosis sa depanug sa medoo hinagtay inimatayan da. Tinoyo di pelanggana sa sebaed, owoy igsawel di sa sebaed diyà sa atung kenà da eg-ulow sa ibegay da diyà si Nemula. ⁷Agulé kinuwa di ma siedò igsulat di sa pasad i Datù Nemula diyà kenagda, owoy binasa di diyà sa medoo etaw. Hê, migsagbì da langun, guwaen da, “Tigtu mangunut ké diyà sa langun uledin igsugù i Datù Nemula.”

⁸Agulé kinuwa i Mosis sa depanug dalem sa pelanggana, owoy pinebegisbisan di sa medoo etaw. Guwaen di, “Siini depanug, ini sa tandà sa kepasad yu mangunut diyà sa langun uledin igsugù i Datù Nemula diyà keniyu.”

Ini Sa Ego I Mosis Migtekedeg Dema Diyà Sa Getan Sinay

(Éksodo 24:12-18; 25:1-2,8-9)

¹²Agulé mig-ikagi Datù Nemula i diyà si Mosis, guwaen di, “Tekedeg ka dema diyà siini getan. Ligò ko eg-ugpà dahini, ibegay ku diyà keniko sa dakel melugpayang batu sinulatan ku sa medoo uledin ku anì itulù ko diyà sa medoo etaw.”

¹³⁻¹⁴Huenan di, mig-ikagi Mosis i diyà sa medoo kaunutan tegeIslaél, guwaen di, “Angat yu daa dahini taman sa egoh ké mekelikù dema. Kaini si Alon owoy si Hul. Amuk duen etaw egkesesigbolow, angay yu diyà kenagda peantang.” Agulé inuwit i Mosis Hosuwa i salu di owoy migtekedeg da diyà sa getan kenà i Nemula.

¹⁵Na, egoh i Mosis migtekedeg diyà sa Getan Sinay, nelimunan dema gaeb sa pulu tuduk. ¹⁶⁻¹⁷Owoy migtenà sa senang i Datù Nemula diyà sa tuduk. Ego sa medoo tegeIslaél mighaa iya wé, lagà dakel apuy sa senang i Nemula diyà sa pulu tuduk. Taman enem agdaw nelimunan gaeb iya wé tuduk. Agulé ego di neuma sa kepitu di agdaw, inumow

i Datù Nemula kedu diyà sa teliwadà gaeb Mosis i. ¹⁸Na, egoh i Mosis migtekedeg, migpelahuk diyà sa gaeb. Epat pulù agdaw lapeg sipeg sa lugay di eg-ugpà dahiya.

25 ¹Agulé mig-ikagi Datù Nemula i diyà si Mosis, guwaen di, ²“Ikagiyi ko sa medoo tegeIslaél anì megay da diyà kenak, owoy kuna sa sumakem sumalà dé sa nehemilì sa pedu da ibegay.

⁸“Owoy pebaeli ko ma diyà kenagda sa dakel kemalig ku. Tigtu mapulù iya wé kemalig, enù ka iya lagà sa kenà ku umugpà anì takà a umunut-unut diyà keniyu. ⁹Amuk baelan yu sa kemalig ku owoy sa langun tigol di dalem, ilingi yu daa sa ukit-ukit ipetiig ku diyà keniko.”

25:10–31:17 Na, egoh i Mosis eg-ugpà pelà diyà sa getan taman epat pulù agdaw, igtulù i Datù Nemula diyà kenagdi sa ukit kebael da sa kemalig i Nemula. Tinulon di diyà si Mosis anì eghemilien di sa medoo etaw diyà sa medoo tegeIslaél anì baelan da sa kemalig owoy sa medoo tigol di dalem. Kunul hinagtay sa iatep da sa kemalig owoy sa ikelatkat da ma.

Na, dalem sa kemalig, duen sa ginis ihabeng diyà sa teliwadà luwang di anì mebaluy duwa sa bilik di. Na, sa bilik di denu selat, pinengadanan da sa Mapulù Bilik i Nemula. Duen dahiya sa lamisan sinukuban bulawan kenà da egtenà sa epan ibegay da diyà si Nemula. Duen ma sa duwa metaes kayu di atung kenà da eggsabà amuk eg-uwiten da. Igtagù da ma diyà sini bilik sa taguan sulù épê pitu panga. Na sa pitu panga di, anan épê sulù, owoy bulawan sa binaelan da sa taguan sulù. Igsugù i Nemula ma anì meelutan sipeg sa keulow da lana olibu diyà sa sulù.

Na, pinengadanan da sa keduwa di bilik di sa Tigtu Mapulù Bilik i Nemula. Iya sa kenà di igtagù sa Baul Tandà Sa Igpasad i Nemula sinukuban bulawan. Na, duen ma sa duwa metaes kayu atung kenà da eggsabà amuk eg-uwiten da sa Baul, owoy dinalem da ma sa kaenen mana owoy sa melugpayang batu sinulatan sa uledin i Nemula.

Na, diyà duwangen sa kemalig, duen sa binaelan da sa atung kenà da eg-ulow sa ibegay da diyà si Nemula. Sinukuban galang sa atung kenà da eg-ulow. Duen ma sa duwa metaes kayu di atung kenà da eggsabà amuk eg-uwiten da. Duen ma diyà sa duwangen di sa dakel pelanggan binaelan da galang sa atung kenà sa tegesimbà egpegusè.

Na, sa medoo langun taman diyà sa kemalig binaelan da, inilingan da sa medoo igsgugù i Nemula diyà si Mosis. Duen ma sa binaelan da anì melemu sa keuwit da sa kemalig owoy sa langun taman di amuk meuma sa kehalì da.

Igtulù i Nemula ma diyà si Mosis sa kebael da sa ginis sa medoo atung tegesimbà, owoy igtulù di ma sa ukit sa kegalal i Mosis si Alon owoy sa anak di anì kagda sa atung egbael sa galebek sa tegesimbà.

31 ¹⁸Na, egoh i Datù Nemula ubus mig-ikagi diyà si Mosis diyà sa Getan Sinay, igbegay di diyà kenagdi siedò duwa melugpayang batu sinulatan i Nemula sa medoo uledin di.

**Ini Sa Egoh Sa Medoo TegeIslaél Migpenemula
Sa Binaelan Da Éhê Palas Sapi**

32 ¹Na, danà i Mosis nelugay diyà sa getan, nesetipon sa medoo tegeIslaél diyà si Alon owoy guwaen da, “Baeli ko sa penemulawen ké anì dumuen sa umuwit kenita, enù ka endà netiigan ta duu sa nebaelan i Mosis sa mig-uwit kenita kedu Igiptu dò.”

²Migsagbì Alon i, guwaen di, “Amuk hediya, lengà yu sa medoo bulawan igtunggal sa sawa yu owoy sa medoo anak yu ma, owoy uwit yu diyà kenak.” ³Huenan di, linengà sa langun etaw sa tunggal da bulawan owoy ighated da diyà si Alon. ⁴Egoh i Alon migkuwa sa medoo bulawan da, tinunag di owoy igdusdus di diyà sa limbagan enù ka egbaelan di sa éhê palas sa manepeng nati sapi maama. Agulé mig-ikagi sa medoo etaw, guwaen da, “Ini dé sa penemulawen ta, kita i tegeIslaél, enù ka ini sa nemula ta mig-uwit kenita kedu Igiptu dò.”

⁵Na, egoh i Alon neketiig sa penemdem da, binaelan di diyà sa taengan sa inetaw éhê palas sapi sa atung kenà da eg-ulow sa ibegay da diyà si Nemula. Agulé inikagiyan di sa medoo etaw, guwaen di, “Simag baelan ta sa pista keolò ta si Datù Nemula.” ⁶Aglulé egoh di umenaw simag, miglapus da egbegay sa medoo hinagtay sumbalien da anì ulowen da diyà siedò atung kenà da eg-ulow sa ibegay da, owoy duen ma sa duma hinagtay egsumbalien da owoy egkaenen da ma anì tandaan da sa kepigtuu da diyà sa inetaw egpenemulawen da. Egpenuu da egkaen owoy meibeg da eg-inem sa mekehilu, agulé egkeanggan da egbael sa medoo balangan medaet.

⁷Aglulé, mig-ikagi Datù Nemula i diyà si Mosis, guwaen di, “Pelikù ka dé diyà sa medoo duma ko tegeIslaél sa inuwit ko kedu Igiptu dò, enù ka ini egoh di migkedaet sa egbaelan da. ⁸Apiya di pa endà nelugay di, migsekê da dé diyà sa medoo uledin ku diyà kenagda. Binaelan da sa inetaw bulawan éhê palas sa maama nati sapi owoy iya sa egpenemulawen da. Iya ma dé sa kenà da egbegay sa medoo igpeuloy da. Owoy ini ma sa kagi da, guwaen da, ‘Ini sa penemulawen ta, kita i tegeIslaél, enù ka ini sa nemula ta mig-uwit kenita kedu Igiptu dò.’ ⁹Na, netiigan ku doo sa pedu siedò medoo etaw owoy sa ketegas ulu da ma. ¹⁰Huenan di, yaka eghawid kenak enù ka tigtu egbulitan ku kagda, owoy pigtamayan ku kagda imet. Dodoo kuna, pedoowen ku sa tugod ko anì mebaluy da dake segenuwa.”

¹¹Dodoo migpehiduhidu Mosis i diyà si Datù Nemula sa egpigtuuwen di. Guwaen di, “O Datù Nemula, yaka egbael duu iya wé. Yaka egbulitan duu sa medoo etaw ko inuwit ko kedu Igiptu dò danà sa medoo panduan binaelan ko danà sa dake egkegaga ko. ¹²Enù ka amuk imatayan ko kagda ini egoh di, mekeikagi sa medoo tegeIgiptu, guwaen da dò, endà

mepion sa uyot i Nemula, enù ka inuwit di sa medoo tegeIslaél kedu diyà sa tanà ta anì imatayan di kagda imet dutu siedò getan. Huenan di, egpegeni a diyà keniko anì endà ipetuu ko duu sa kebulit ko kenagda anì endà ma meketuu siini penemdem ko peangay sa dakel kepigtamay ko diyà sa medoo etaw ko. ¹³Ketulengi ko sa medoo etaw ko si Ablaham owoy si Isak owoy si Hakob, enù ka migpasad ka diyà kenagda anì pedoowen ko sa tugod da anì lagà da sa kedoo bituen diyà langit, owoy igpasad ko ma ibegay ko diyà kenagda sa tanà Kanan anì mehagda taman melugay.” ¹⁴Huenan di, nesenuê Datù Nemula i owoy endà igpetuu di duu sa penemdem di migtamay sa medoo etaw di.

¹⁵Agulé migpelikù eglungel Mosis i, owoy inuwit di siedò duwa melugpayang batu sa sinedibaluy egsulatan sa uledin i Nemula. ¹⁶Na, si Nemula sa migbael sa melugpayang batu owoy kagdi ma sa migsulat sa uledin di dahiya.

¹⁷Na, egoh i Hosuwa migdineg sa lukiyang sa medoo etaw, mig-ikagi diyà si Mosis, guwaen di, “Hediya ka duen gila diyà sa kenà sa medoo duma ta.”

¹⁸Dodoo migsagbi Mosis i, guwaen di, “Sa metaled dagì egdinegen ko, beken hediya sa keumow sa etaw migtaban owoy beken ma sa keumow sa etaw tinabanan, dodoo dagì duyuy polo sa kedineg ku.”

¹⁹Agulé egoh da i Mosis medapag dé diyà sa kenà da nesetipon, hinaa di sa binaelan da inetaw éhê palas sa maama nati sapi, owoy hinaa di ma sa medoo etaw egdelayaw. Hê, tigtu egbulit, huenan di igdugsù di diyà sa esudan getan siedò melugpayang batu sinulatan sa uledin i Nemula. Hê, minepesà sa melugpayang batu. ²⁰Agulé kinuwa i Mosis sa inetaw éhê palas maama nati sapi binaelan da owoy inulow di diyà sa apuy owoy linupet di nekeiling bukbuk. Agulé igbuhbuh di diyà sa wayeg anì ipeinem di diyà sa medoo tegeIslaél.

²¹Agulé inigsaan di Alon i, guwaen di, “Ngadan sa binaelan siini medoo etaw diyà keniko? Maen di ya egpandayaen ko kagda egbael siini dakel salà?”

²²Migsagbi Alon i, guwaen di, “O Datù, yaka egbulit kenak, enù ka netiigan ko doo sa pedu siini medoo etaw owoy sa ungayà da egbael medaet. ²³Huenan di, guwaen da diyà kenak, Baeli ko sa nemula ké anì dumuen sa umuwit kenita, enù ka endà egketiigan ta duu sa nebaelan i Mosis sa mig-uwit kenita kedu Igiptu dò. ²⁴Agulé guwaen ku diyà kenagda amuk duen etaw épê sa imu-imu bulawan, lengaen da owoy uwiten da ma diyà kenak. Egoh ku migkuwa iya wé, igdugsù ku diyà sa apuy. Hê, nebaluy dé polo inetaw éhê palas nati sapi.”

²⁵Na, netiigan i Mosis egpengahàngahà sa medoo etaw enù ka endà nekegaga Alon i eghawid kenagda. Huenan di, mebaluy pelononon sa medoo kuntelà da kagda. ²⁶Agulé mig-angay Mosis i diyà sa bengawan

sa kenà da eg-ugpà, owoy mig-umow, guwaen di, “Angay yu diyà kenak, kiyu i langun etaw egpangunut diyà si Datù Nemula.” Agulè migpedapag diyà kenagdi sa langun tugod i Lebi.

²⁷Agulè mig-ikagi Mosis i diyà kenagda, guwaen di, “Ini sa kagi i Datù Nemula sa egpigtuuwen ta, kita i tegelIslaél. Seliketi yu sa sundang yu. Seluh yu timbul diyà siini kenà ta eg-ugpà taman mekeuma yu dibaluy dò. Imatayi yu sa medoo duma yu tegelIslaél, apiya di pa sa duma yu telahadi ataw ka sa loyuk yu ataw ka sa duma yu neseduwangen dalesan.” ²⁸Hê, pinangunutan sa medoo tugod i Lebi sa igsugù i Mosis. Nekeuma telu ngibu sa kedoo etaw inimatayan da egoh iya wé agdaw. ²⁹Agulè guwaen i Mosis, “Na, tigtu egtandaan yu dé sa kepangunut yu diyà sa uyot i Datù Nemula, enù ka apiya sa anak yu ataw ka sa duma yu telahadi, inimatayan yu doo enù ka iya sa igsugù i Nemula. Huenan di, tabangan i Datù Nemula kiyu ini egoh di.”

³⁰Na, egoh di umenaw simag, mig-ikagi Mosis i diyà sa medoo tegelIslaél, guwaen di, “Tigtu dakel sa salà binaelan yu. Dodoo tumekedeg a dema mangay diyà sa kenà i Datù Nemula dutu siedò getan anì pegeniyen ku sa kepeuloy di hedem sa salà yu.”

³¹Agulè migtekedeg dema Mosis i diyà sa getan. Egoh di migtebow diyà sa kenà i Datù Nemula, guwaen di, “Tigtu dakel sa salà binaelan siini medoo etaw, enù ka binaelan da sa inetaw bulawan owoy pinenemula da ma. ³²Gasama iya, tigtu egpegeniyen ku diyà keniko anì ipeuloy ko sa salà da, amuk mebaluy. Dodoo amuk endà ipeuloy ko duu, kedani ko sa ngadan ku diyà sa libelu kenà ko egsulat sa ngadan sa medoo etaw ko.”

³³Migsagbi Datù Nemula i, guwaen di, “Sumalà dé sa etaw nesalà diyà kenak, iya sa kedanan ku ngadan diyà sa libelu ku. ³⁴Na, uwit ko sa medoo tegelIslaél mangay dutu siedò tinulon ku diyà keniko, owoy iya sa humuna diyà keniyu sa egsugùsuguen ku. Dodoo meuma kani sa agdaw egoh ku migtamay siini medoo tegelIslaél danà sa salà da.”

³⁵Hê, neuma dé sa kepigtamay di kenagda, enù ka pinelinadu i Datù Nemula sa medoo etaw danà da migpenemula sa inetaw éhê palas nati sapi sa igpebael da diyà si Alon.

33 *33:1-11 Na, sinugù i Datù Nemula sa medoo tegelIslaél anì lumegkà da diyà sa Getan Sinay. Edung egoh iya, takà eg-ikagi Datù Nemula i diyà si Mosis diyà sa kemalig eg-uwit-uwiten da sumalà dé sa angayan da.*

Ini Sa Egoh I Nemula Migpasad Sa Kitabang Di Sa Medoo Etaw Di

(Éksodo 33:12-23)

¹²Na, mig-ikagi dema Mosis i diyà si Datù Nemula, guwaen di, “Tuu sa inikagi ko aken sa umuwit siini medoo etaw kedu diyà Igiptu taman

mekeuma ké diyà sa tanà igpasad ko ibegay diyà kenami. Dodoo endà pa tinulon ko duu diyà kenak ngadan tayu di etaw sa salu ku peunuten ko diyà kenak. Ini ma sa inikagi ko egkilalaen ko aken owoy egketuuwan ka ma diyà kenak. ¹³Na, amuk tuu ka egketuuwan diyà kenak, tului ko atu sa penemdem ko diyà kenak anì metiigan ku ma sa uyot ko anì muman a mael sa kenà ko metuuwan. Owoy ketulengi ko ma sa egoh ko mighemilì siini medoo tegeIslaél anì kagda sa etaw ko.”

¹⁴Migsagbì Datù Nemula i, guwaen di, “Munut-unut a doo diyà keniya, owoy tabangan ku ma kiyu anì tumaban yu diyà sa medoo kuntelà yu owoy anì kumelanìh ma sa keugpà yu diyà sa tanà angayan yu.”

¹⁵Agulé guwaen i Mosis, “Mepion amuk hediya, enù ka amuk endà munut-unut ka diyà kenami, yaka ma egpelegkà kenami dahini. ¹⁶Enù ka amuk endà munut-unut ka diyà kenami, endà metiigan sa medoo liyu balangan etaw duu sa egoh ko netuuwan diyà kenak owoy diyà siini medoo etaw ko ma. Dodoo amuk munut-unut ka diyà kenami, tigtu metumàmaan da sa egoh ko mighemilì kenami diyà sa medoo liyu etaw diyà siini sinukub langit.”

¹⁷Agulé guwaen i Datù Nemula, “Baelan ku doo sa pinegeni ko, enù ka egketuuwan a diyà keniko owoy netiigan ku ma sa pedu ko.”

¹⁸Guwaen i Mosis, “Amuk hediya, mebaluy pa atu ipehaa ko diyà kenak sa senang ko?”

¹⁹Migsagbì Nemula i, guwaen di, “Tumalà a diyà sa taengan ko anì hauwen ko sa senang ku, owoy tulonen ku ma diyà keniko sa mapulù ngadan ku, aken i Datù Nemula. Aken sa humemilì sa etaw hiduwan ku, owoy aken ma sa humemilì sa etaw tabangan ku. ²⁰Dodoo endà mehaa ko duu sa palas ku, enù ka endà mehagtay di sa etaw humaa kenak.

²¹Dodoo duen sa batu medapag diyà kenak sa kenà ko meketigdeg.

²²Amuk tumalà sa senang ku, iawuh ku kuna diyà sa elà sa batu, owoy limunan ku kuna sa kagpa belad ku taman endà tumalà a. ²³Amuk migtalà a dé, awangan ku kuna anì hauwen ko sa iyug ku, dodoo endà daa hauwen ko duu sa palas ku.”

Ini Sa Egoh I Nemula Migsulat Dema Sa Uledin Di Diyà Sa Melugpayang Batu

(Éksodo 34:1-9,27-28)

34 ¹Na, mig-ikagi dema Datù Nemula i diyà si Mosis, guwaen di, “Baeli ko sa duwa melugpayang batu lagà mendaa sa muna batu, enù ka isulat ku dema diyà kenagda sa uledin ku sa igsulat ku diyà sa muna batu pinesà ko. ²Tapay ko dé baeli ini egoh di, enù ka simag tekedeg ka dema diyà sa Getan Sinay anì telabuken ko aken dutu siedò pulu tuduk. ³Yaka eg-uwit ta sa duma ko, owoy hahaa ko anì endà

umutuh sa etaw diyà siedò getan. Apiya sa medoo hinagtay yu, yoko egpetabtab duu diyà sa esudan sa getan.”

⁴Huenan di, binaelan i Mosis sa duwa melugpayang batu lagà mendaa sa muna. Egoh di umenaw simag, miglapus egtekedeg diyà sa Getan Sinay owoy inuwit di sa duwa melugpayang batu, enù ka iya sa igsugù i Datù Nemula diyà kenagdi. ⁵Agulé migtenà Datù Nemula i egpeunutan gaeb diyà sa pulu tuduk. Migtigdeg medapag diyà si Mosis owoy inikagi di ma sa mapulù ngadan di, si Datù Nemula.^k ⁶Migtalà diyà sa taengan i Mosis, owoy pinetaled di sa kagi di, guwaen di, “Aken si Datù Nemula, sa tigtu mehidu owoy tegetabang. Endà melemu a mulit. Endà egkehali sa dakel kehidu ku owoy kesaligan a ma. ⁷Petuuwen ku doo sa igpasad ku kehidu taman sengibu getugod, owoy ipeuloy ku sa medaet egbaelan da owoy sa salà da ma. Dodoo sa etaw egkeiyap egbael salà, pigtamayan ku doo kagda owoy sa tugod da taman sa bébè siku da.”

⁸Agulé petow dé migligkued Mosis i owoy migsimbà, ⁹guwaen di, “O Datù Nemula, amuk tigtu ka egketuuwan diyà kenak, egpegeniyen ku diyà keniko sa keunut-unut ko diyà kenami. Metegas ulu siini medoo etaw, dodoo peuloyi ko sa medaet egbaelan ké owoy sa salà ké, owoy pelagà ko ma kami sa tigtu etaw ko.”

34:10-26 Na, binaelan i Nemula dema sa pasad di diyà sa medoo etaw di owoy igtulù di ma sa medoo uledin anì kumepion sa keugpà da diyà sa tanà angayan da owoy anì kumepion ma sa adat kesimbà da diyà si Datù Nemula.

²⁷Na, egoh i Datù Nemula ubus mig-ikagi iya wé, guwaen di dema diyà si Mosis, “Sulati ko siini medoo kagi ku, enù ka ini sa nesesapadan ta. Amuk pangunutan yu, niyu doo sa langun igpasad ku ibegay diyà keniko owoy diyà sa medoo tegeIslaél.” ²⁸Na, epat pulù agdaw lapeg sigep dema sa lugay i Mosis diyà sa kenà i Datù Nemula diyà sa getan. Egoh di dutu, endà egkaen di owoy endà ma eg-inem di. Igsulat di diyà sa melugpayang batu sa kagi i Nemula nesesapadan da. Iya sa Sepulù Uledin di.

Ini Sa Egoh Sa Palas I Mosis Migsenang

(Éksodo 34:29-35)

²⁹Na, egoh i Mosis eglungel kedu diyà sa Getan Sinay, inuwit di sa duwa melugpayang batu sinulatan sa sepulù uledin i Nemula. Migsenang sa palas di danà da egseolomoy si Datù Nemula, dodoo endà netiigan di duu. ³⁰Agulé egoh i Alon owoy sa medoo tegeIslaél mighaa sa palas i Mosis egsenang, egpesu da egpedapag diyà kenagdi. ³¹Dodoo inumow i Mosis kagda. Huenan di migpelikù Alon i owoy sa medoo kaunutan

^k **34:5** Siini Datù Nemula, Yahweh sa ngadan di diyà sa kagi Hibelu.

tegeIslaél eg-angay diyà kenagdi, owoy inikagiyan i Mosis kagda. ³²Agulé egoh di neubus sa keseolomoy da, mig-angay ma dé egpedapag sa langun tegeIslaél diyà kenagdi. Hê, tinulon i Mosis diyà kenagda sa langun uledin igpetiig i Datù Nemula diyà kenagdi dutu Getan Sinay dò.

³³Na, egoh i Mosis neubus migtulon sa kagi i Nemula diyà kenagda, linimunan di sa palas di. ³⁴Dodoo uman umangay Mosis i diyà sa kemalig kenà i Datù Nemula anì mikagi diyà kenagdi, egkedanan di dema sa iglimun di diyà sa palas di. Owoy amuk lumaun, egtulonon di dema diyà sa medoo duma di tegeIslaél sumalà dé sa igpeikagi i Datù Nemula diyà kenagdi. ³⁵Hê, hinaa da egsenang dema sa palas di. Huenan di, eglimun di sa palas di taman endà meuma sa egoh di mangay dema mikagi diyà si Datù Nemula.

35:1–40:33 Na, egselepangen i Nemula sa ukit kebael da sa Dakel Kemalig kenà sa medoo tegeIslaél egsimbà diyà si Datù Nemula. Inilingan da sa igtulù i Nemula diyà si Mosis diyà sa Getan Sinay. Inuwit sa medoo etaw sa igbegay da diyà si Nemula anì dumuen sa medoo langun taman anì egbaelan da sa Dakel Kemalig owoy sa medoo tigol di owoy sa mapulù ginis sa medoo tegesimbà. Migsubela sa igbegay da. Duen ma medoo maama owoy bayi hinemilì i Nemula anì tigtu metiigan da sa kebael da sa igpetiig i Nemula diyà si Mosis.

Ini Sa Egoh Di Migtenà Sa Senang I Datù Nemula Diyà Sa Kemalig Simbaan Da

(Éksodo 40:34-38)

40 ³⁴Na, egoh da neubus migbael sa Dakel Kemalig simbaan da, migtenà dahiya sa beletukoy mighuna diyà sa medoo tegeIslaél egoh da eg-ipanaw. Owoy takà ma egkelegdawan sa kemalig danà sa senang i Datù Nemula. ³⁵Huenan di, endà egpekeludep Mosis i diyà sa Dakel Kemalig enù ka eg-ugpà dahiya sa gaeb owoy nebensek senang i Datù Nemula sa luwang kemalig.

³⁶Na, ini sa ukit keipanaw sa medoo tegeIslaél. Uman egpesoyol sa beletukoy migtenà diyà sa Dakel Kemalig, mipanaw da dema. ³⁷Dodoo amuk endà egpesoyol di, endà pelà mipanaw da. Eg-angat-angatan da sa egoh sa beletukoy egpesoyol, hê iya da pelawà mipanaw. ³⁸Huenan di, edung egoh iya taman sa lugay da eghalihali diyà sa melabel tanà mediyù dalesan, tapay doo eghauwen da iya wé beletukoy inugpaan i Nemula. Amuk agdaw, eg-ugpà diyà sa Dakel Kemalig; dodoo amuk sigep, lagà apuy sa palas di enù ka iya sa tandà i Datù Nemula eg-unut-unut diyà kenagda.